

















藏書世紀卷三

明聖繼統

孝文皇帝

孝文皇帝諱恒母薄姬也高祖誅陳豨定代地立恒爲代王高后崩諸呂謀爲亂丞相陳平太尉周勃朱虛侯劉章等共誅之使人迎代王代王郎中令張武等議皆曰漢大臣皆故高帝時將習兵事多謀詐其屬意非止此也特畏高帝呂太后威耳今已誅諸呂新喋血京師以迎代王爲名實不可信願稱疾無往以觀其變中尉宋昌進曰羣臣之議皆非也夫秦失其政豪傑並起人人自以爲得之者



以萬數然卒踐天子位者劉氏也天下絕望一矣高帝王子弟地犬牙相制所謂磐石之宗也天下服其彊二矣漢興除秦煩苛約法令施德惠人人自安難動搖三矣夫以呂太后之嚴立諸呂爲三王擅權專制然而太尉以一節入北軍一呼士皆袒左爲劉氏叛諸呂卒以滅之此乃天授非人力也今大臣雖欲爲變百姓弗爲使其黨寧能專一邪內有朱虛東牟之親外畏吳楚淮南琅邪齊代之彊方今高帝子獨淮南王與大王大王又長賢聖仁孝聞於天下故大臣因天下之心而欲迎立大王大王勿疑也代王報太后計猶豫未定卜之兆得大橫占曰大橫庚庚余



爲天王夏啓以光代王曰寡人固已爲王又何王乎卜人  
曰所謂天王者乃天子也於是代王乃遣太后弟薄昭見  
太尉勃勃等具言所以迎立王者昭還報曰信矣無可疑  
者代王乃令宋昌驂乘張武等六人乘六乘傳詣長安至  
高陵止而使宋昌先之長安觀變昌至渭橋丞相已下皆  
迎昌還報代王乃進至渭橋羣臣拜謁稱臣代王下拜太  
尉勃進曰願請問宋昌曰所言公公言之所言私王者無  
私太尉勃乃跪上天子璽代王謝曰至邸而議之閏月已  
酉入代邸羣臣從至請卽天子位代王西鄉讓者三南鄉  
讓者再遂卽天子位羣臣以次侍使太僕嬰東牟侯典居



先清宮奉天子法駕迎代邸。皇帝卽夕入未央宮。夜拜宋昌爲衛將軍。領南北軍。張武爲郎中令。行殿中。還坐前殿。元年冬十月辛亥。謁高廟。徙右丞相平爲左丞相。太尉勃爲右丞相。大將軍灌嬰爲太尉。諸呂所奪齊楚故地皆復與之。壬子。遣車騎將軍薄昭迎皇太后于代。詔益封太尉周勃邑萬戶。賜金五千斤。丞相陳平將軍灌嬰邑各三千戶。金二千斤。朱虛侯章襄平侯通東牟侯興居邑各二千戶。金千斤。封典客揭爲陽信侯。賜金千斤。盡除收帑相坐律令。正月。有司請蚤建太子。詔曰。朕旣不德。上帝神明未歆饗也。天下人民未有愿志。今縱不能博求天下賢聖有



德之人而嬪天下焉。而曰：「豫建太子，是重吾不德也。」謂天下何？其安之？是有司曰：「豫建太子，所以重宗廟社稷，不忘天下也。」上曰：「楚王，季父也；春秋高，閱天下之義理多矣。明於國家之大體，吳王，於朕兄也；淮南王，弟也，皆秉德以陪朕是。豈爲不豫哉？」諸侯王宗室昆弟有功臣多賢及有德義者，若舉有德以陪朕之不能終，是社稷之靈，天下之福也。今不選舉焉，而曰：「必子，人其以朕爲忘賢有德者而專於子。」非所以憂天下也。朕甚不取。有司固請曰：「立嗣必子，所從來遠矣。」高帝始平天下，建諸侯爲帝者太祖，諸侯王列侯始受國者，亦皆爲其國祖，子孫繼嗣，世世不絕，天下之大



義也。故高帝設之以撫海內。今釋室建而更選於諸侯宗室。非高帝之志也。更議不安。子啓最長。敦厚慈仁。請建以爲太子。上乃許之。因賜天下民當爲父後者爵一級。上從。代來初卽位。施德惠天下。鎮撫諸侯。四夷皆歡洽。乃修從代來功臣。詔封周昌爲壯武侯。諸從朕六人。官皆至九卿。又詔曰。列侯從高帝入蜀漢者六十八人。皆益邑各三百戶。故吏二千石以上。從高帝潁川守尊等十人。食邑六百戶。淮陽守申屠嘉等十人。五百戶。衛尉定等十人。四百戶。封淮南王舅趙兼爲周陽侯。齊王舅駟鈞爲靖郭侯。故常山丞相蔡兼爲樊侯。二年。丞相陳平薨。詔曰。朕聞古者諸



侯建國千餘歲、各守其地、以時入貢、民不勞苦、上下歡欣、靡有違德、今列侯多居長安、邑遠、吏卒給輸費苦、而列侯亦無繇教訓其民、其令列侯之國、爲吏及詔所止者、遣太子、三月有司請立皇子爲諸侯王、詔曰、前趙幽王幽死、朕甚憐之、已立其太子遂爲趙王、遂弟辟彊、及齊悼惠王子朱虛侯章、東牟侯興居、有功、可王、乃遂立辟彊爲河間王、章爲城陽王、興居爲濟北王、因立皇子武爲代王、參爲太原王、揖爲梁王、五月詔曰、古之治天下、朝有進善之旌、誹謗之木、所以通治道而來諫也、今法有誹謗詖言之罪、是使衆臣不敢盡情、而上無由聞過失也、將何以來遠方之



賢良其除之民或祝詛上以相約而後相謾吏以爲大逆其有他言吏又以爲誹謗此細民之愚無知抵歿朕甚不取自今以來有犯此者勿聽治九月賜天下民今年田租之半仍親率羣臣農以勸之三年詔曰前日詔遣列侯之國或辭未行丞相朕之所重其爲朕率列侯之國遂免丞相勃遣就國五月匈奴入居北地河南爲寇上幸甘泉遣丞相灌嬰擊匈奴匈奴去上自甘泉之高奴因幸太原畱游十餘日濟北王興居聞帝之代乃反於是詔以棘蒲侯柴武爲大將軍擊之八月虜濟北王興居自殺赦諸興居反者四年封齊悼惠王子七人爲列侯六年淮南王長



謀反廢遷蜀嚴道。死。雍八年封淮南厲王長子四人爲列侯。十二年春出孝惠皇帝后宮美人令得嫁。三月賜農民今年租稅之半。十三年除肉刑法。十四年匈奴寇邊殺北地都尉卬。上親勞軍勒兵申教令。賜吏卒。自欲征匈奴羣臣諫不聽。皇太后固要上乃止。於是。以東陽侯張敖爲大將軍。擊匈奴。匈奴遷去。其春詔曰。朕獲執犧牲珪幣以事上帝宗廟十四年矣。以不敏不明而久撫臨天下。朕甚自媿。昔先王遠施不求其報。望祀不祈其福。右賢左戚。先民後己。至明之極也。今聞祠官祝釐皆歸福於朕。不爲百姓。人以朕之不德而專鄉獨美其福。百姓不與焉。是重吾



不德也。其令祠官致敬無有所祈。十五年黃龍見於成紀。詔議郊祀。公孫臣明服色。新垣平設五廟。夏上幸雍。始郊見五帝。修名山大川嘗祀而絕者。有司以歲時致禮。十六年立齊悼惠王子六人。淮南厲王子三人。皆爲王。秋九月得玉杯。刻曰人主延壽。明年改元。後元年新垣平詐覺謀反。夷三族。詔曰間者數年比不登。又有水旱疾疫之災。朕甚憂之。愚而不明。未達其咎。意者朕之政有所失而行有過與。乃天道有不順。地利或不得。人事多失和。鬼神廢不享與。何以致此。將百官之奉養或費。無用之事或多與。何其民食之寡乏也。夫度田非益寡。而計民未加益。以口量



地其於古猶有餘而食之甚不足者其咎安在無乃百姓之從事於末以害農者蕃爲酒醪以靡穀者多六畜之食焉者衆與細大之義吾未能得其中其與丞相列侯吏二千石博士議之有可以佐百姓者率意遠思無有所隱後二年匈奴和親詔曰朕旣不明不能遠德使方外之國或不寧息夫四荒之外不安其生封圻之內勤勞不處二者之咎皆自於朕之德薄而不能達遠也間者累年匈奴並暴邊境多殺吏民夫久結難連兵中外之國將何以自寧故遣使者冠蓋相望結轍於道以諭朕志於單于今單于反古之道計社稷之安便萬民之利新與朕俱棄細過偕



之大道結兄弟之義以全天下元元之命和親以定始于  
今年後六年匈奴三萬騎入上郡三萬騎入雲中以河內  
太守周亞夫爲將軍次細柳及宗正劉禮等爲將軍次霸  
上等處以備胡後七年夏六月帝崩葬霸陵遺詔曰朕聞  
之萬物之生靡不有死當今之世咸嘉生而惡歿厚葬以  
破業重服以傷生吾甚不取且朕旣不德無以佐百姓今  
崩又使重服久臨以罹寒暑之數哀人之父子損其飲食  
絕其祭祀謂天下何朕獲保宗廟以眇眇之身託于天下  
君王之上二十有餘年矣今乃幸以天年得復供養于高  
廟朕之不明與嘉之其奚哀念之有其令天下吏民令到



出臨三日、皆釋服、無禁取婦嫁女祠祀飲酒食肉者、自當

身崩而念在民真仁人哉真聖王哉

給喪事服臨者、皆無踐經帶無過三寸、無布車及兵器無

發民哭臨宮殿、宮殿中當臨者、皆以旦夕各十五舉聲、非

旦夕臨時、禁無得擅哭、以下服大紅十五日、小紅十四日、

纖七日、釋服、霸陵山川、因其故、無有所改、歸夫人以下至

少使、班氏曰、孝文皇帝卽位二十三年、宮室苑囿、車騎服

御、無所增益、有不便、輒施以利民、嘗欲作露臺、召匠計之、

直百金、上曰、百金、中人十家之產也、吾奉先帝宮室、常恐

羞之、何以臺爲、身衣弋綈、所幸慎夫人、衣不曳地、帷帳無

文繡、治霸陵、皆瓦器、不得以金銀銅錫爲飾、因其山、不起



墳南越尉佗自立爲帝，召貴佗兄弟，以德懷之。佗遂稱臣，與匈奴結和親，後而背約入盜。只令邊備守，不冑發兵深入。吳王詐病不朝，賜以几杖。張武等受賂金錢，覺更加賞，賜以媿其心，專務以德化民。是以海內殷富，興於禮義，斷獄數百，幾致刑措焉。李生曰：歷代詔令多文飾，惟孝文詔書字字出肺腸，讀之令人深快。予故備載之。孝文深得退一步法，自然脚跟穩實。故其詔令不虛也。學者未知黃帝老子之實，謂之異端。楊朱氏能令天下禍敗，吁！請細觀焉。毋但嘯前人糟粕也。

景帝卽位之元年，詔曰：功莫大於高皇帝，德莫盛於孝文。



皇帝高皇帝、安爲帝者、太祖之廟、孝文皇帝、安爲帝者、太宗之廟、天子、安世世獻祖宗之廟、三年、吳王濞、膠西王卬、楚王戊、趙王遂、濟南王辟光、菑川王賢、膠東王雄渠、皆舉兵反、遣太尉亞夫、大將軍竇嬰、將兵擊之、斬吳王濞於丹徒、膠西王卬等皆自殺、四年夏、立皇子榮爲皇太子、徹爲膠東王、七年春、廢皇太子榮爲臨江王、四月、立膠東王徹爲皇太子、後元年、條侯周亞夫下獄、歿、三年、帝崩、在位十六年、班氏曰、孔子稱斯民三代之所以直道而行也、信哉、周秦之敝、網密文峻、而姦宄不勝、漢興、掃除煩苛、與民休息、至于孝文、加之以恭儉、景遵業、五六十一年之間、至於



移風易俗、黎民淳厚、周云成康、漢言文景、美矣。  
董份曰、太史深服文帝、故末復總敘其德化、海內殷富、二  
句、結盡孝文功效矣。

英雄繼創

孝武皇帝

孝武皇帝、景帝第十子也、建元元年冬十月、詔丞相御史  
列侯中二千石、二千石、諸侯相、舉賢良方正、直言極諫之  
士、遣使者安車蒲輪束帛加璧徵魯申公、三年閩越圍東  
甌、東甌告急、遣中大夫嚴助持節發會稽兵、浮海救之、未  
至閩越、走兵還、五年置五經博士、六年閩越王郢攻南越、



遣大行王恢將兵出豫章、大司農韓安國出會稽擊之、未至、越人殺郢降、兵還、元光二年冬、行幸雍、祠五畤、春、詔問公卿曰、朕飾子女以配單于、金幣文繡賂之甚厚、單于待命加嫚、侵盜亡已、邊境被害、朕甚閔之、今欲舉兵攻之、何如、大行王恢建議、空擊、乃以御史大夫韓安國爲護軍、將軍衛尉李廣爲驍騎將軍、太僕公孫賀爲輕車將軍、大行王恢爲將屯將軍、大中大夫李息爲材官將軍、將三十萬衆屯馬邑谷中、誘致單于、欲襲擊之、單于入塞、覺之、走出、六月、軍罷、將軍王恢坐首謀不進、下獄、死、六年、匈奴入上谷、殺略吏民、遣車騎將軍衛青出上谷、騎將軍公孫敖出



代輕車將軍公孫賀出雲中、驍騎將軍李廣出鴈門、青至、  
龍城、獲首虜七百級、廣敖失師而還、元朔元年冬、詔曰、公  
卿大夫所使、總方略、壹統類、廣教化、美風俗也、夫本仁祖  
義、褒德錄賢、勸善刑暴、五帝三王所繇、昌也、朕夙興夜寐、  
嘉與宇內之士、臻於斯路、故旅耆老、復孝敬、選豪俊、講文  
學、稽叅政事、祈進民心、深詔執事、興廉舉孝、庶幾成風、紹  
休聖緒、夫十室之邑、必有忠信、三人並行、厥有我師、今或  
至闔郡而不薦一人、是化不下、究而積行之君子、雍於上、  
聞也、二千石官長、紀綱人倫、將何以佐朕、燭幽隱、勸元元、  
厲蒸庶、崇鄉黨之訓哉、且進賢受上賞、蔽賢蒙顯戮、古之



道也。其與中二千石、禮官、博士議不舉者，罪有司。奏議曰：古者諸侯貢士，壹適謂之好德；再適謂之賢賢；三適謂之有功，乃加九錫，不貢士。一則黜爵，再則黜地，三則黜爵地。畢矣。夫附下罔上者，死；附上罔下者，刑；與聞國政而無益於民者，斥；在上位而不能進賢者，退。此所以勸善黜惡也。今詔書昭先帝聖緒，令二千石舉孝廉，所以化元元、移風易俗也。不舉孝，不奉詔，當以不敬論；不察廉，不勝任也。當免奏可。秋，匈奴入遼西，殺太守，入漁陽、鴈門，敗都尉，殺略三千餘人。遣將軍衛青出鴈門，將軍李息出代，獲首虜數千級。二年，匈奴入上谷、漁陽，殺略吏民千餘人。遣將軍衛



青李息出雲中至高闕遂西至符離獲首虜數千級收河  
南地置朔方五原郡四年冬行幸甘泉夏匈奴入代定襄  
上郡殺略數千人五年春大將軍衛青將六將軍兵十餘  
萬人出朔方高闕獲首虜萬五千級夏丞相公孫弘請爲  
博士置弟子員由是學者益廣秋匈奴入代殺都尉六年  
春大將軍衛青將六將軍兵十餘萬騎出定襄斬首三千  
餘級而還夏四月衛青復將六將軍絕幕大克獲前將軍  
趙信軍敗降匈奴右將軍蘇建亡軍獨身脫還贖爲庶人  
六月詔置武功賞官以寵戰士元狩元年冬十月行幸雍  
祠五畤獲白麟作白麟之歌十一月淮南王安衡山王賜



謀反誅黨與死者數萬人二年冬行幸雍祠五時遣驃騎將軍霍去病出隴西至臯蘭斬首八千餘級夏將軍去病公孫敖出北地二千餘里過居延斬首虜三萬餘級秋匈奴入鴈門殺略數百人遣衛尉張騫郎中令李廣皆出右北平廣殺匈奴三千餘人盡亡其軍四千人獨身脫還及公孫敖張騫皆後期當斬贖爲庶人是月也匈奴昆邪王殺休屠王并將其衆合四萬餘人來降置五屬國以處之以其地爲武威酒泉郡三年秋匈奴入右北平定襄殺略千餘人四年夏大將軍將四將軍出定襄將軍去病出代青至幕北圍單于斬首萬九千級至闐顏山乃還去病與



左賢王戰斬獲首虜七萬餘級封狼居胥山乃還兩軍戰  
士歿者數萬人前將軍廣後將軍食其皆後期廣自殺食  
其贖歿五年春丞相李蔡有罪自殺六年秋大司馬驃騎  
將軍去病薨元鼎元年得鼎汾水上二年冬丞相莊青翟  
下獄歿春起栢梁臺四年冬行幸雍祠五畤十一月立后  
土祠于汾陰脽上還至洛陽封周孽子嘉爲周子南君以  
奉周祀封方士樂大爲樂通侯位上將軍六月得寶鼎后  
土祠旁秋馬生渥洼水中作寶鼎天馬之歌五年冬行幸  
雍祠五畤遂踰隴登空同西臨祖厲河而還夏四月南越  
王相呂嘉反殺漢使者秋遣伏波將軍路博德等將兵并



馳義侯遺別將巴蜀罪人發夜郎兵下牂牁江咸會番禺  
九月丞相趙周下獄歿樂通侯樂大坐誣罔要斬西羌衆  
十萬人反與匈奴通六年發隴西天水安定騎士及中尉  
河南河內卒十萬人遣將軍李息郎中令徐自爲征西羌  
平之馳義侯遺兵未及下便令征西南夷遂定越地以爲  
南海蒼梧鬱林合浦交趾九真日南珠厓儋耳郡定西南  
夷以爲武都牂牁越巂沈黎文山郡秋東越王餘善反遣  
橫海將軍韓說中允王溫舒出會稽樓船將軍楊僕出豫  
章擊之元封元年冬詔曰南越東甌咸伏其辜西蠻北夷  
頗未輯睦朕將巡邊垂擇兵振旅躬秉武節置十二部將



軍親帥師焉、行自雲陽北、歷上郡、西河、五原、出長城北、登單于臺、至朔方、臨北河、勒兵十八萬騎、旌旗徑千餘里、威震匈奴、遣使者告單于曰、南越王頭已縣於漢北闕矣、單于能戰、天子自將待邊、不能、亟來臣服、何但亡匿幕北寒苦之地爲、匈奴讐焉、還祠黃帝於橋山、迺歸甘泉、是月也、東越殺王餘善降、乃詔曰、東越險阻、反覆爲後世患、乃盡遷其民於江淮、春、行幸緱氏、詔曰、朕用事華山、至于中嶽、翌日、親登嵩高、御史乘屬在廟旁、吏卒咸聞呼萬歲者三、令加增太室祠、行、遂東巡海上、夏四月、還、登封泰山、降坐明堂、詔以十月爲元封元年、復東巡海上、至碣石、自遼西、



歷北邊九原歸于甘泉二年春幸緱氏遂至東萊夏還祠  
泰山至瓠子臨決河命從臣將軍以下皆負薪塞河隄作  
瓠子之歌還作甘泉通天臺長安飛廉館詔曰甘泉宮內  
中產芝九莖連葉其赦天下賜雲陽都百戶牛酒作芝房  
之歌秋朝鮮叛遣樓船將軍楊僕左將軍荀彘將應募罪  
人擊之又遣將軍郭昌中郎將衛廣發巴蜀兵平西南夷  
未服者以爲益州郡三年春作角抵戲三百里內皆來觀  
夏朝鮮斬其王右渠降以其地爲樂浪臨屯玄菟真番郡  
四年冬行幸雍祠五畤通回中道遂北出蕭關歷獨鹿鳴  
澤自代而還五年冬行南巡狩至於盛唐望祀虞舜于九



嶷登潛天柱山自尋陽浮江親射蛟江中獲之舳艫千里  
薄樅陽而出作盛唐樅陽之歌遂北至琅邪並海所過禮  
祠其名山大川春還至泰山增封祠高祖于明堂以配上  
帝因朝諸侯王列侯受郡國計赦天下所幸縣毋出今年  
租賦秋大司馬大將軍青薨六年詔曰蓋有非常之功必  
待非常之人故馬或奔蹏而致千里士或有負俗之累而  
立功名夫泛駕之馬跡弛之士亦在御之而已其令州郡  
察吏民舉茂材異等堪爲將相及使絕國者太初元年冬  
行幸泰山乙酉栢梁臺災十二月禮高里祠后土東臨渤  
海望祠蓬萊二月起建章宮夏五月正歷以正月爲歲首



色尚黃、數用五、定官名、協音律、遣因杆將軍公孫敖築塞、  
外受降城、秋行幸安定、遣貳師將軍李廣利發天下謫民、  
西征大宛、二年行幸河東、祠后土、秋遣浚稽將軍趙破奴、  
二萬騎出朔方、擊匈奴不還、三年春行東巡海上、夏還修、  
封泰山、禪石闕、四年春貳師將軍廣利斬大宛王首、獲汗、  
血馬來、作西極天馬之歌、冬行幸回中、天漢元年春行幸、  
甘泉郊泰畤、二年春行幸東海、還幸回中、夏貳師將軍三、  
萬騎出酒泉、與右賢王戰于天山、斬首虜萬餘級、又遣因、  
杆將軍出西河、騎都尉李陵將步兵五千人出居延北、與、  
單于戰、斬首虜萬餘級、陵兵敗降匈奴、是月也、泰山琅邪、



羣盜徐勃等阻山攻城遣直指使者暴勝之等衣繡衣杖  
斧分部逐捕刺史郡守以下皆伏誅三年春行幸泰山修  
封祀明堂因受計還幸北地祠常山瘞玄玉赦天下行所  
過毋出田租秋匈奴入鴈門四年發天下七科謫及勇敢  
士遣貳師將軍李廣利將兵萬騎步兵七萬人出朔方因  
杆將軍公孫敖萬騎步兵三萬人出鴈門游擊將軍韓說  
步兵三萬人出五原彊弩都尉路博德步兵萬餘人與貳  
師會廣利與單于戰余吾水上敖與左賢王戰不利皆引  
還太始三年行幸東海獲赤鴈作赤鴈之歌幸琅邪禮日  
成山登之罘浮大海山稱萬歲冬賜行所過戶五千錢鰥



寡孤獨帛人一匹四年春行幸泰山夏四月幸不其祠神  
人于交門宮若有鄉坐拜者作交門之歌征和元年春還  
行幸建章宮二年春丞相賀下獄歿三年春行幸雍至安  
定北地匈奴入五原酒泉殺兩都尉三月遣貳師將軍廣  
利將七萬人出五原廣利敗降匈奴六月丞相屈氂下獄  
要斬妻子梟首四年春行幸東萊臨大海後元元年春正  
月行幸甘泉郊泰畤遂幸安定二年春二月立皇子弗陵  
爲皇太子丁卯帝崩葬茂陵在位五十四年

守成明辟

孝昭皇帝



孝昭皇帝、武帝少子也、母曰趙婕妤、本以有奇異得幸、及生帝亦奇異、後元二年立爲太子、年八歲、以侍中奉車都尉霍光爲大司馬、大將軍受遺詔輔少主、明日武帝崩、太子卽皇帝位、大將軍光秉政、領尚書事、車騎將軍金日磾、左將軍上官桀副焉、始元元年、車騎將軍日磾薨、元鳳元年、鄂邑長公主、燕王旦與左將軍上官桀、桀子驃騎將軍安、御史大夫桑弘羊皆謀反、伏誅、時帝年十四、能知其詐、深信大將軍光、語在光傳、二年詔曰、朕聞百姓未贍、前年減漕三百萬石、頗省乘輿馬、及苑馬、以補邊郡、三輔傳馬、其令郡國毋斂今年馬口錢、三輔太常郡得以菽粟當賦、



三年春泰山有大石自起立上林有柳樹枯僵自起生元平元年夏四月帝崩葬平陵在位十三年

守成令主

孝宣皇帝

孝宣皇帝武帝曾孫戾太子孫也太子納史良娣生史皇孫皇孫納王夫人生宣帝號曰皇曾孫生數月遭巫蠱事太子良娣皇孫王夫人皆遇害曾孫雖在襁緥猶坐收繫郡邸獄時丙吉爲廷尉監治巫蠱郡邸獄故曾孫賴吉得全因遭大赦吉迺載曾孫送祖母史良娣家後有詔掖庭養視上屬籍宗正掖庭令張賀嘗事戾太子思顧舊恩哀



曾孫奉養甚謹嘗以私錢供給教書既壯爲取暴室嗇夫許廣漢女曾孫因依倚廣漢兄弟及祖母家史氏受詩於東海濩中翁高材好學然亦喜游俠鬪雞走馬以此具知閭里奸邪吏治得失數上下諸陵周徧三輔常困於蓮勺鹵中尤樂杜鄠之間率常在下杜時會朝請舍長安尚冠里身足下有毛臥居數有光耀每買餅所從買家輒大讐亦以是自怪至是卽皇帝位大赦天下立皇后許氏本始元年大將軍光稽首歸政上謙讓委任益封大將軍光萬七千戶三年春皇后許氏崩四年春立皇后霍氏地節二年大司馬大將軍光薨上始親政事又思報大將軍功德



迺復使樂平侯山領尚書事、而令羣臣得奏封事、以知下情、五日一聽事、自丞相以下各奉職奏事、以傳奏其言、考試功能、侍中尚書功勞當遷、及有異善、厚加賞賜、至于子孫終不改易、樞機周密、品式備具、上下相安、莫有苟且、三年春詔曰、蓋聞有功不賞、有罪不誅、雖唐虞猶不能以化天下、今膠東相王成勞來不急、流民自占八萬餘口、治有異等、其秩成中二千石、賜爵關內侯、四年秋大司馬霍禹謀反伏誅、八月皇后霍氏廢、九月詔曰、死者不可生、刑者不可息、今繫者或以掠辜、若饑寒、瘡歿獄中、何用心逆人道也、其令郡國歲上繫囚、以掠笞若瘡歿者所坐名縣爵



里丞相御史課殿最以聞元康二年春立皇后王氏四年  
詔諸年八十以上非誣告殺傷人者他皆勿坐神爵元年  
詔曰朕承宗廟戰戰栗栗惟萬事統未燭厥理迺元康四  
年嘉穀玄稷降于郡國神爵乃集金芝九莖產于函德殿  
銅池中九真獻奇獸南郡獲白虎威鳳爲寶東濟大河天  
氣清靜神魚舞河幸萬歲宮神爵翔集朕之不德懼不能  
任其以五年爲神爵元年是年西羌反後將軍充國言屯  
田之計二年羌虜降服置金城屬國以處降羌秋匈奴日  
逐王先賢擇將人衆萬餘來降使都護西域騎都尉鄭吉  
迎日逐破車師九月匈奴單于遣名王奉獻賀正月始和



親三年春起樂游苑秋八月詔曰吏不廉平則治道衰今  
小吏皆勤事而奉祿薄欲其毋侵漁百姓難矣其益吏百  
石以下奉十五四年春潁川太守黃霸以治行尤異秩中  
二千石賜爵關內侯黃金百斤五月匈奴單于遣弟呼嚭  
若王勝之來朝五鳳二年匈奴呼遯累單于帥衆來降封  
爲列侯四年匈奴單于稱臣遣弟谷蠡王入侍以邊塞少  
寇減戍卒什二大司農中丞耿壽昌奏設常平倉以給北  
邊省轉漕賜爵關內侯甘露元年匈奴呼韓邪單于遣子  
右賢王銖婁渠堂入侍匈奴單于遣弟左賢王來朝三年  
春正月行幸甘泉郊泰畤匈奴呼韓邪單于稽侯弭來朝



贊謁稱藩臣而不名。二月，單于罷歸，遣長樂衛尉高昌侯忠等將萬六千騎送單于。單于居幕南保光祿城，詔北邊振穀食，郅支單于遠遁。匈奴遂定。是年，詔諸儒講五經同異。太子太傅蕭望之等平奏其議，上親稱制臨決，乃立梁丘易、大小夏侯尚書。穀梁春秋博士。黃龍元年冬十二月，帝崩，葬杜陵。在位二十五年。

元帝之母共哀許皇后也。宣帝微時生民間，年二歲，宣帝卽位，八歲立爲太子。太子柔仁好儒，見宣帝所用多文法吏，好以刑名繩下。大臣楊惲、蓋寬饒等坐刺譏辭語而誅。嘗侍燕，從容言曰：「陛下持刑太深，宜用儒生。」宣帝作色曰：



漢家自有制度，本以霸王道雜之，奈何純任德教，用周政乎？且俗儒不達時宜，好是古非今，使人眩於名實，不知所守，何足委任？乃歎曰：亂我家者，太子也！繇是疏太子而愛淮陽王。曰：淮陽王明察好法，宜爲吾子。而王母張婕妤尤幸，上有意欲用淮陽王代太子，然以少依許氏，俱從微起，終不忍肯。久之，拜韋玄成爲淮陽中尉，以玄成常讓爵於兒，欲以感諭憲王。由是太子遂安。宣帝崩，太子卽皇帝位。初元元年，立皇后王氏。二年冬，詔曰：國之將興，尊師而重傳，故前將軍望之傳朕八年，道以經書，厥功茂焉。其賜爵關內侯，食邑八百戶，朝朔望。十二月，中書令弘、恭、石顯等



諸望之令自殺三年珠厓郡山南縣反待詔賈捐之以爲

宐棄珠厓乃罷珠厓永光四年以渭城壽陽亭部原上爲

初陵詔曰安土重遷黎民之性骨肉相附人情所願也頃

者有司奏徙郡國民以奉園陵令百姓遠棄先祖墳墓破

業失產親戚別離非人情也今所爲初陵者勿置縣邑建

昭三年秋護西域騎都尉甘延壽副校尉陳湯橋發戊巳

校尉屯田吏士及西域胡兵攻郅支單于斬其首傳詣京

師縣蠻夷邸門竟寧元年詔曰匈奴郅支單于背叛禮義

旣伏其辜呼韓邪單于不忘恩德復修朝賀之禮願保塞

傳之無窮邊垂長無兵革之事其改元爲竟寧賜單于待



詔掖庭王嬙爲閼氏五月帝崩在位十六年班彪贊曰臣  
外祖兄弟爲元帝侍中語臣曰元帝多材藝善史書鼓琴  
瑟吹洞簫自度曲被歌聲分判節度窮極幼眇少而好儒  
及卽位徵用儒生委之以政貢薛韋匡迭爲宰相雖寬弘  
盡下出於恭儉號令溫雅有古之風然牽制文義優游不  
○真○斷孝宣之業衰矣

成帝母曰王皇后元帝在太子宫生甲觀畫堂爲世嫡皇  
孫宣帝愛之字曰太孫常置左右年三歲而宣帝崩元帝  
卽位帝爲太子初居桂宮上嘗急召太子出龍樓門不敢  
絕馳道西至直城門得絕乃度還入作室門上遲之問其



故以狀對上大說乃著令令太子得絕馳道云其後幸酒樂燕樂上不以為能而定陶恭王有材藝母傳昭儀又愛幸上以故常有意欲以恭王為嗣賴侍中史丹護太子家輔助有力上亦以先帝尤愛太子故得無廢元帝崩太子即皇帝位以元舅侍中衛尉陽平侯王鳳為大司馬大將軍領尚書事建始元年賜舅王譚商立根逢時爵關內侯逐○皇○故○六月有青蠅無萬數集未央宮殿中朝者坐八月有兩月相承晨見東方河平二年封舅譚商立根逢時皆為列侯三年光祿大夫劉向校中祕書謁者陳農使使求遺書於天下四年匈奴單于來朝鴻嘉元年上始為微行出二年



春行幸雲陽博士行飲酒禮有雉蜚集于庭歷階升堂而  
雉三年皇后許氏廢永始元年封婕妤趙氏父臨爲城陽  
侯封舅曼子侍中騎都尉光祿大夫王莽爲新都侯六月  
立皇后趙氏三年尉氏男子樊並等十三人謀反山陽鐵  
官徒蘇令等二百二十八人攻殺長吏盜庫兵自稱將軍  
元延元年昭儀趙氏害後宮皇子二年行幸長楊宮從胡  
客大校獵綏和元年詔曰朕奉宗廟二十五年至今未有  
繼嗣定陶王欣於朕爲子慈仁孝順可以承天序繼祭祀  
其立欣爲皇太子二年帝崩在位二十六年班彪贊曰臣  
之姑充後宮爲婕妤父子昆弟侍帷幄數爲臣言成帝善



修容儀、升車正立、不內顧、不疾言、不親指、臨朝淵嘿、尊嚴  
西、出、一、簡、道、卒、先、生、  
若神、可謂穆穆天子之容矣。博覽古今、容受直辭、公卿稱  
職、奏議可述。遭世承平、上下和睦、湛于酒色。趙氏內亂、外  
家擅朝、言之可爲於邑者也。建始以來、王氏始執國命、哀  
平短祚、莽遂篡位、蓋其威福所由來者漸矣。

哀帝、元帝第二子、定陶恭王長子也。帝親孝成之世、祿去  
王室、屢誅大臣、欲彊主威、以則武宣。然寵信讒諂、憎疾忠  
直、安能彊乎。在位六年、享國不永、哀哉。

平帝、元帝第三子、中山孝王長子也。年九歲卽位、五年王  
莽鴆弑之。



纂弑盜賊

王莽

王莽字巨君，孝元后之弟子也。父曼蚤歿，不侯。莽羣兄弟皆將軍五侯子，乘時侈靡，以輿馬聲色佚遊相高。莽獨孤貧，因折節爲恭儉，勤身博學，被服如儒生。外交英俊，內事諸父，曲有禮意。陽朔中，世父大將軍鳳病，莽侍疾，親嘗藥，亂首垢面，不解衣帶者連月。鳳且歿，以託太后及帝，拜爲黃門郎，遷射聲校尉。久之，叔父成都侯商上書願分戶邑以封莽。及長樂少府戴崇、中郎陳湯等皆當時名士，咸爲莽言。上由是賢莽。永始元年，封新都侯，國南陽新野之都。



鄉千五百戶遷騎都尉侍中爵位益尊姑○人○節操愈厲散輿馬  
衣裘振施賓客收贍名士交結將相卿大夫甚衆故在位  
更推薦之是時大司馬曲陽侯根乞骸骨薦莽自代上遂  
擢爲大司馬莽旣拔出同列繼四父而輔政欲令名譽過  
前人賞賜邑錢悉以享士愈爲儉約輔政歲餘成帝崩哀  
帝卽位莽杜門自守其中子獲殺殺一子奴莽切責獲令自殺在  
國三歲吏民上書冤訟莽者以百數賢良周護宋崇等對  
策深訟莽於是徵莽歲餘哀帝崩無子太皇太后卽日遣  
使者馳召莽詔尚書諸發兵符節百官奏事中黃門期門  
兵皆屬莽拜莽爲大司馬使迎中山王奉成帝後是爲平



帝。帝年九歲。太后臨朝稱制。委政於莽。莽以大司徒孔光  
名儒相三主。太后所敬信。乃盛尊事光。而引光女壻甄邯  
爲侍中。奉車都尉。於是附順者拔擢。忤恨者誅滅。王舜王  
邑爲腹心。甄豐甄邯主擊斷。平晏領機事。劉歆典文章。孫  
建爲牙爪。豐子尋歆子棻。涿郡崔發。南陽陳崇。皆以材能  
幸於莽。莽色厲而言方。欲有所爲。微見風采。黨與承其指  
意。而顯奏之。莽卽稽首涕泣。固推讓。上以惑太后。下以示  
信於衆庶。始風益州令塞外蠻夷獻白雉。羣臣因奏言太  
后委任大司馬。莽定策安宗廟。故大司馬霍光有安宗廟  
之功。益封三萬戶。疇其爵邑。比蕭相國。莽空如光故事。太



后問公卿曰誠以大司馬有大功當著之邪將以骨肉故

欲異之也於是羣臣乃盛陳莽功德言莽有定國安漢家

之大功宜賜號曰安漢公以故蕭相國甲第為安漢公第

於是莽受太傅安漢公號讓還益封疇爵邑事云願須百

姓家給然後加賞皮○三○寸○也○虧○希○堅○揚○之○圖○得○像○莽既說眾意又欲專斷知太后厭政乃

風公卿奏言太后不宜親省小事惟封爵乃以聞他事安

漢公四輔平決莽又欲以虛名說太后因上書願出錢百

萬獻田三十頃欲大司農助給貧民每有水旱莽輒素食

所以誑耀媚事太后下至旁側長御方故萬端莽又欲以

女配帝為皇后奏言乃者國家之難本從亡嗣配取不正



請考論五經博采二王後及周公孔子世列侯在長安者  
適子女事下有司上衆女名王氏女多在選中莽恐其與  
已女爭卽上言身亡德子材下不安與衆女並采太后以  
○似○卓○老○卷○爲至誠乃下詔曰王氏女朕之外家其勿采公卿大夫咸  
言安漢公盛勲堂堂今當立后願得公女爲天下母莽遣  
長史以下分部曉止公卿及諸生而上書者愈甚太后不  
得已聽公卿采莽女遂立爲皇后初莽自太后以帝幼年  
奉太宗爲成帝後安明一統之義以戒前事遣甄豐奉璽  
綬卽拜帝母衛姬爲中山孝王后賜帝舅衛寶寶弟玄爵  
關內侯皆畱中山不得至京師恐其與已爭權也莽子宇



以莽隔絕衛氏恐帝長大後見怨卽私遣人與寶等通書  
教令帝母上書求入莽不聽宇與婦兄呂寬議以爲莽不  
可諫而好鬼神可爲變怪以驚懼之卽使寬夜持血灑莽  
第門吏發覺莽執宇送獄飲藥死宇妻懷子繫獄須產子  
已殺之莽奏言宇爲呂寬等所誣誤流言惑衆與管蔡同  
罪臣不敢隱其誅莽因是誅滅衛氏窮治呂寬之獄連引  
郡國豪傑素非議已者死者以百數海內震焉五年冬平  
帝疾莽作策請命於泰畤戴璧秉珪願以身代藏策金滕  
置于前殿好作俑勅諸公勿敢言十二月平帝崩時元帝世絕而  
宣帝曾孫有見王五人列侯四十八人莽惡其長大曰兄



弟不得相爲後乃選玄孫中最幼廣戚侯子嬰年二歲託以爲卜相最吉是月前輝光謝囂奏武功長孟通浚井得白石上圓下方有丹書著石文曰告安漢公莽爲皇帝符命之起自此始矣莽使羣公以白太后太后曰此誣罔天下不可施行太保王舜謂莽非敢有他但欲稱攝以重其權鎮服天下耳明年改元曰居攝居攝元年安衆侯劉崇與相張紹謀曰安漢公專制朝政必危劉氏天下非之者莫敢先舉此宗室恥也吾帥宗族爲先海內必和紹等從者百餘人遂進攻宛不得入而敗羣臣復白劉崇等謀逆者好說以莽權輕也安尊重以鎮海內五月太后詔莽朝見太



后稱假皇帝二年九月東郡太守翟義立嚴鄉侯劉信爲

天子移檄郡國言莽毒殺平帝攝天子位今共行天罰誅

莽衆十餘萬莽惶懼不能食晝夜抱孺子告禱郊廟放大

好名作此俑人也

誥作策十二月王邑等破翟義於國莽旣滅翟義自謂威

德日盛獲天人助遂謀卽真之事矣初翟義等舉兵欲誅

莽太后聞之曰人心不相遠也我雖婦人亦知莽必以是

自危其後莽遂以符命自立爲真皇帝以居攝三年爲初

不○必○驚○矣

始元年改號曰新先奉諸符瑞以白太后太后大驚初漢

高祖入咸陽秦王子嬰降奉上始皇璽高帝卽位因御服

其璽世世傳受號曰漢傳國璽以孺子未立璽藏長樂宮



及莽卽位請璽太后不、必、不、可、矣太后不肯授莽莽使安陽侯舜諭指舜素

謹敕太后雅愛信之舜既見太后知其爲莽求璽怒罵之

曰爾屬父子宗族蒙漢家力富貴累世既無以報受人孤

哀哉

寄乘便利時奮取其國不復顧恩義人如此者猪狗不食

其餘天下豈有爾兄弟耶且若自以金匱符命爲新皇帝

變更正朔服制亦當自更作璽傳之萬世何用此亡國不

祥璽爲而欲求之我漢家老寡婦旦暮且歿欲與此璽俱

葬終不可得太后因涕泣而言旁側長御以下皆垂涕舜

亦悲不能自止良久乃仰謂太后臣等已無可言者莽必

欲得傳國璽太后曰能終不與邪太后聞舜語切恐莽欲



脇之乃出漢傳國璽投之地以授舜曰我老已矣知而兄  
弟今族滅也莽既得傳國璽又欲改太后漢家舊號易其  
璽綬恐不見聽而莽疎屬王諫欲諂莽上書言皇天廢去  
漢而命立新室太皇太后不安稱尊號當隨漢廢以奉天  
命莽乃車駕至東宮親以其書白太后太后曰此言是也  
莽因曰此諄德之臣也罪當誅於是冠軍張永獻符命言  
太皇太后當爲新室文母太皇太后莽乃率羣公奉上皇  
太后璽綬鳩殺王諫而封張永爲貢符子初莽爲安漢公  
時又諂太后奉尊元帝廟爲高宗太后晏駕後當以禮配  
食云及莽改號太后爲新室文母絕之於漢墮壞孝元廟

好○一○篇○王○莽○祭○文○



更爲文母太后起廟、獨置孝元廟、故殿以爲文母、簋食堂、  
既成名曰長壽宮、莽以太后好出遊觀、乃車駕置酒長壽  
宮、請太后、既至、見孝元廟廢徹塗地、太后驚泣曰、此漢家  
宗廟、皆有神靈、與何治而壞之、且使鬼神無知、又何用廟  
爲、如令有知、我乃人之妃妾、豈安辱帝之堂、以陳饋食哉、  
私謂左右曰、此人嫚神多矣、能久得祜乎、飲酒不樂而罷、

說○得○通○是○

太后沒年八十四、沒後十年、而漢兵誅莽孺子嬰三年、  
篡位十八年、而更始代之、凡二年、而光武卽皇帝位、



六  
先。年。以。十。四。刻。  
其。精。米。林。字。子。美。江。蘇。武。進。人。嘉。慶。中。舉。人。授。江。蘇。武。進。知。縣。嘉。慶。十。四。年。卒。年。五。十。四。歲。著。有。詩。集。名。曰。十。四。刻。其。精。米。林。字。子。美。江。蘇。武。進。人。嘉。慶。中。舉。人。授。江。蘇。武。進。知。縣。嘉。慶。十。四。年。卒。年。五。十。四。歲。著。有。詩。集。名。曰。十。四。刻。

其。精。米。林。字。子。美。江。蘇。武。進。人。嘉。慶。中。舉。人。授。江。蘇。武。進。知。縣。嘉。慶。十。四。年。卒。年。五。十。四。歲。著。有。詩。集。名。曰。十。四。刻。  
其。精。米。林。字。子。美。江。蘇。武。進。人。嘉。慶。中。舉。人。授。江。蘇。武。進。知。縣。嘉。慶。十。四。年。卒。年。五。十。四。歲。著。有。詩。集。名。曰。十。四。刻。  
其。精。米。林。字。子。美。江。蘇。武。進。人。嘉。慶。中。舉。人。授。江。蘇。武。進。知。縣。嘉。慶。十。四。年。卒。年。五。十。四。歲。著。有。詩。集。名。曰。十。四。刻。  
其。精。米。林。字。子。美。江。蘇。武。進。人。嘉。慶。中。舉。人。授。江。蘇。武。進。知。縣。嘉。慶。十。四。年。卒。年。五。十。四。歲。著。有。詩。集。名。曰。十。四。刻。



乘亂草竊

公孫述

公孫述字子陽扶風人也王莽天鳳中爲導江太守居臨邛有能名及更始立豪傑各起兵應漢南陽人宗成自稱虎牙將軍略漢中郡商人王岑自稱定漢將軍殺王莽庸部牧以應成衆合數萬述聞之遣使迎成成等至虜掠暴橫述不能堪乃召縣中豪傑謂曰天下同苦新室復思劉氏故聞漢將軍到皆歡喜奉迎今百姓無辜婦子繫獲室屋燒燔此寇賊耳吾欲保郡自守以待真主諸卿欲并力者卽畱不欲者便去皆叩頭曰願效死述乃使人詐稱漢



使者自東方來假述益州牧印綬述卽選兵西擊成等大破之而降其衆二年秋更始遣將徇蜀漢述恃其地險衆附欲自立乃使其弟恢於綿竹大破擊更始之將由是威震益部自立爲蜀王都成都蜀地肥饒述見兵力精彊遠方士度多往歸附邛笮君長亦來貢獻建武元年述遂稱帝初世祖積苦兵間以隗囂遣子內侍公孫述遠據邊陲謂諸將曰且當置此兩子於度外後又謂岑彭曰人苦不知足旣得隴復望蜀耶每一發兵頭髮爲白因休諸將於洛陽分軍十於河內數騰書巴蜀告示禍福述初不答及世祖伐蜀岑彭吳漢臧宮來歙等又水陸並進岑彭擊破



侯丹藏宮破降王元及延岑之衆。馬成等遂破河池。平武。  
都述始懼使客刺殺來歙。帝仍與公孫述書示以丹青之。  
信。述左右皆勸述降。述曰廢興命也。豈有降天子哉。冬十。  
月。述又使刺客詐爲亡奴降岑彭。夜刺殺彭。十二年春。吳。  
漢破公孫述將于魚涪津。因入犍爲界。諸縣皆城守。詔漢。  
直取廣都。據其腹心。漢乃進軍攻廣都。拔之。遣輕騎燒成。  
都市橋。公孫述將相皆恐。日夜叛述而去。帝必欲降述。復。  
下詔諭之曰。勿以來歙。岑彭受害自疑。今以時自詣。則宗。  
族可完。述終無降意。冬十一月。公孫述引兵出戰。吳漢擊。  
殺之。延岑乃以成都降。蜀地平。吳漢夷述妻子。盡滅公孫。

○亦○雄○



氏而族延岑放兵大掠焚燒宮室帝聞大怒遣人譴漢又

何也

真聖士

讓其副劉尚曰城降三日吏人從服孩兒老母口以萬數

邀

一旦放兵縱火何以爲心尚宗室子孫嘗更吏職乃亦行

此耶蜀平後帝以任延爲武威郡戒之曰善事上官無失

名譽延曰臣聞忠臣不私私臣不忠履正奉公臣子之節

上下雷同非陛下之福善事上官臣不敢奉詔帝歎曰卿

言是也十三年詔封鄧禹爲高密侯食四縣李通爲固始

大是

侯賈復爲膠東侯食六縣帝欲完功臣爵土不令以吏職

爲過遂罷左右將軍官耿弇亦上大將軍印綬皆以列侯

就第加位特進奉朝請賈復爲人剛毅方直多大節旣還



私第闔門養威重。宋祐等薦復堪宰相。帝方以吏事責三公。故功臣並不用。是時列侯唯高密固始膠東三侯與公卿參議大事。







藏書世紀卷四

聖主重興

漢世祖皇帝

世祖光武皇帝諱秀字文叔南陽白水鄉人高祖九世孫也出自景帝生長沙定王發發生春陵節侯以至南頓令欽欽生光武光武身長七尺三寸美鬚眉大口隆準日角勤於稼穡而兄伯升好俠養士常非笑光武比之高祖兄仲王莽地皇三年光武避吏新野因賣穀於宛宛人李通等以圖讖說光武云劉氏復起李氏爲輔光武初不敢當然獨念天下方亂於是乃與李通從弟軼等謀起兵時年



二十八矣。光武遂將賓客還春陵。時伯升已會衆起春陵，春陵子弟恐懼皆亡。逃自匿曰：伯升殺我，及見光武絳衣大冠，皆驚曰：謹厚者亦復爲之。乃稍自安。伯升於是招新市平林兵與其帥西擊長聚。光武初騎牛，殺新野尉，乃得馬。進攻棘陽，拔之。更始元年，漢軍大破莽兵於淝水西。伯升又破莽，納言嚴尤將軍陳茂兵於滎陽，進圍宛城。二月，立劉聖公爲天子，伯升爲大司徒。光武爲太常偏將軍。三月，光武別與諸將徇昆陽，定陵鄧皆下之，多得牛馬財物穀數十萬斛，轉以饋宛下。莽大懼，遣王尋王邑將兵百萬，甲士四十二萬，復與嚴尤陳茂合，盡驅諸猛獸虎豹犀象。



之屬以助威武。諸將見尋邑兵盛，反馳入昆陽，皆惶怖欲散走。光武曰：「今兵穀既少，而外寇彊大，并力禦之，或可立功。如欲分散，勢無兩全。」且宛城未拔，不能相救。昆陽卽破，諸部亦滅。今不同心，膽共舉功名，反欲守妻子財物邪？」諸將咸怒曰：「劉將軍何敢如是！」會候騎還，言大兵且至。城北軍陳數百里，不見其後。諸將遽相謂曰：「更請劉將軍計之。」光武復爲圖畫成敗。諸將皆曰：「諾。」時城中僅有八千餘人。光武乃使大將軍王常畱守，乘夜與李軼等十三騎出城南外收兵。時莽軍到城下者，且十萬。光武幾不得出。旣至鄧定陵，悉發諸營兵，而諸將貪惜財貨，欲分畱守之。光武



曰。今若破敵。珍。瑤。萬倍如爲所敗。首領無餘。何財物之有。衆乃從。六月。光武遂與營部俱進。自將步騎千餘。前去大軍四五里。而陳。尋。邑。亦遣兵數千合戰。光武奔之。斬首數十級。諸部喜曰。劉將軍平生見小敵怯。今見大敵。勇甚可怪也。光武復進。尋。邑。兵却。諸部共乘之。斬首數百。千級。時伯升拔宛已三日。而光武不知。乃僞使持書報城中云。宛下兵到。而陽墮其書。令。尋。邑。得之。諸將既經累捷。膽氣益壯。無不一當百。光武乃與敢死者三千人。從城西水上衝其中堅。尋。邑。陳。亂。乘銳崩之。遂殺王尋。城中亦鼓譟而出。中外合勢。震呼動天地。莽兵大潰。走者相騰踐。奔殪百餘。



里會大雷風屋瓦皆飛雨下如注渰川盛溢虎豹皆股戰  
士卒爭赴溺歿者以萬數水爲不流王邑嚴尤陳茂輕騎  
乘死人渡水逃去盡獲其軍實輜重車甲珍寶不可勝算  
光武因復徇下潁陽會伯升爲更始所害光武自父城馳  
詣宛稱謝司徒官屬來迎弔光武惟深引過不敢自言昆  
陽之功又不敢爲伯升服喪飲食語笑如平常更始以是  
慙拜光武爲破虜大將軍封武信侯九月三輔豪傑共誅  
王莽傳首詣宛更始乃議都洛陽以光武行司隸校尉前  
去整修官府光武致僚屬作文移從事司察一如舊章時  
三輔吏士東迎更始見諸將過皆冠幘而服婦人衣莫不



笑之。及見司隸僚屬，皆歡喜，不自禁。老吏或垂涕曰：「不圖今日復見漢官威儀，由是識者皆屬心焉。」及更始至洛陽，復遣光武行大司馬事，持節北渡河，鎮慰州郡。光武所到，考察黜陟，平遣囚徒，除王莽苛政，復漢官名。吏人喜悅，爭持牛酒迎勞。進至邯鄲，會王子林。詐以卜者王郎爲成帝子，子輿立爲天子。都邯鄲遣使者降下郡國。光武以王郎新盛，乃北徇薊。王郎移檄，購光武十萬戶，而故廣陽王子劉接起兵薊中，以應郎。城內擾亂，轉相驚恐。言邯鄲使者方到二千石以下，皆出迎。於是光武趣駕南轅，晨夜不敢入城邑。舍食道傍，至饒陽，官屬皆乏食。光武乃自稱邯鄲



使者入傳舍傳吏方進食從者飢爭奪之傳吏疑其詐乃  
椎鼓紿言邯鄲將軍至光武升車欲馳旣而徐還坐曰請  
將軍入久乃駕去晨夜兼行蒙犯霜雪面皆破裂至滹沱  
河無船王霸詭言冰堅可渡至則水果合遂得渡進至下  
博城西遲惑不知所之有白衣老父在道旁指曰努力信  
都郡爲長安守去此八十里光武卽馳赴之信都太守任  
光開門出迎世祖因發旁縣得四千人先擊堂陽貫縣皆  
降之王莽和戎卒正邳彤亦舉郡降又昌城人劉植宋子  
人耿純各率宗親子弟據其縣邑以奉光武於是北降下  
曲陽衆稍合樂附者至有數萬人復北擊中山等處移檄



邊部共擊邯鄲郡縣還復響應因入趙界拔廣阿會上谷  
太守耿況漁陽太守彭寵各遣其將吳漢寇恂等將突騎  
來助擊王郎時更始已入長安亦遣其尚書僕射謝躬討  
郎光武因大饗士卒東圍鉅鹿逆戰南轅斬首數千級進  
圍邯鄲連戰破之拔其城誅王郎收文書得吏人與郎交  
關謗毀者數千章光武不省會諸將燒之曰令反側子自  
安更始乃遣持節立光武爲蕭王悉令罷兵詣行在所光  
武用耿弇議辭以河北未平不就徵自是始二於更始是  
時更始政亂四方背叛梁王劉永擅命睢陽公孫述稱王  
巴蜀李憲自立爲睢南王秦豐自號楚黎王張步起琅邪



董憲起東海，延岑起漢中，田戎起夷陵，又別號諸賊銅馬、大彤、高湖、重連、鐵脰、大捨、尤來、上江、青犢、五校、檀鄉、五幡、五樓、富平、獲索等，各領部曲，衆合數百萬人，所在寇掠。光武先擊銅馬於鄔，追至館陶，大破之，受降未盡，而高湖、重連從東南來，與銅馬餘衆合。光武復與大戰，破降之，封其渠帥爲列侯。降者猶不自安。光武知其意，勅令各歸營，勒兵乃自乘輕騎案行部陳。降者更相語曰：「蕭王推赤心置人腹中，安得不投死乎？」由是悉將降人分配諸將，衆遂數十萬。故關西號光武爲銅馬帝。云：青犢、赤眉賊入函谷關，攻更始。光武乃遣鄧禹率六裨將引兵而西，以乘更始。赤



眉之亂、建武元年、光武北擊尤來、大搶五幡於元氏、連破之、乘勝輕進、反爲所敗、賊追急、光武自投高岍、遇突騎王豐、下馬授光武、光武撫其肩而上、顧笑謂耿弇曰、幾爲虜嗤、弇頻射却賊、得免、賊雖戰勝而素懾光武、遂引去、大軍復進至安次、與戰破之、賊入漁陽、光武遣吳漢率耿弇陳俊、馬武等追戰于潞東、及之平谷、復大破之、於是諸將議上尊號、光武大驚、至中山、諸將復請、光武不聽、行到南平棘、諸將復固請、光武曰、寇賊未平、四面受敵、何據欲正號位乎、耿純進曰、天下士大夫捐親戚、棄土壤、從大王於矢石之間者、固望其攀龍鱗、附鳳翼、以成所志耳、今大王留



時逆衆不正號位。純恐士大夫望絕。計窮。則有去歸之思。大衆一散。難可復合。言甚誠切。光武深感曰。吾將思之行。至鄙。彊華自關中奉赤伏符曰。劉秀發兵捕不道。四夷雲集。龍鬪野。四七之際。火爲主。羣臣因復奏請。光武於是命有司。設壇場於鄙南。六月卽皇帝位。建元爲建武。大赦天下。是月。赤眉立劉盆子爲天子。九月。赤眉入長安。更始奔高陵。十月。車駕入洛陽。幸南宮。遂定都焉。十二月。赤眉殺更始。而隗囂據隴右。二年。大司馬吳漢率九將軍擊檀鄉賊於鄴東。大破降之。秋。帝自將征五校。大破五校於蕤陽。降之。三年。馮異與赤眉戰於崤底。大破之。餘衆南向宜陽。



帝自將征之。己亥，親勒六軍，大陳戎馬。大司馬吳漢精卒當前，中軍次之，驍騎武衛分陳左右。赤眉望見，震怖。丙午，赤眉君臣面縛，奉高皇帝璽綬出降。四年，吳漢擊五校賊於箕山，大破之。五年，耿弇等與張步戰於臨淄，大破之。張步斬蘇茂以降，平齊地。六年，山東諸郡悉平。七年，帝自征隗囂。九年，隗囂病歿，衆復立囂子純爲王。十年，來歙等大破純於落門，純降。隴右平。十二年，吳漢率舟師伐公孫述。大破公孫述將謝豐于廣都。十一月，吳漢臧宮與公孫述戰於成都，述被創歿。蜀平。十三年，大司馬吳漢還京。十四年，莎車國、鄯善國遣使奉獻。十六年，交趾女子徵側反。



郡國大姓及兵長羣盜處處並起攻劫在所害殺長吏郡縣追討到則解散去復屯結青徐幽冀四州尤甚冬遣使者下郡國聽羣盜自相糾擿五人共斬一人者除其罪吏雖逗畱迴避故縱者皆勿問其牧守令長坐界內盜賊不收捕又以畏慙捐城委守者皆不問但取獲賊多少爲殿最唯蔽匿者乃罪之於是更相追捕賊並解散徙其魁帥賦田受稟使安生業自是牛馬放牧邑門不閉十七年廢皇后郭氏立貴人陰氏爲皇后甲申幸春陵置酒作樂時宗室諸母因酣悅相與語曰文叔少時謹言與人不款曲唯直柔耳今乃能如此帝聞之大笑曰吾理天下亦欲以



柔道行之十八年遣伏波將軍馬援等擊交阯十九年馬  
援破交阯斬徵側因擊破九真賊盡降之六月詔以皇太  
子彊爲東海王立東海王陽爲皇太子改名莊二十一年  
遣伏波將軍馬援出塞擊烏桓冬鄯善王車師王等十六  
國皆遣子入侍奉獻願請都護帝以中國初定未遑外事  
乃還其侍子厚加賞賜曰如諸國力不從心東西南北自  
在也二十二年烏桓擊破匈奴匈奴北徙幕南地空詔罷  
諸邊郡亭候吏卒二十三年高句驪率種人詣樂浪內屬  
二十四年匈奴薁鞬日逐王比遣使款五原塞求扞禦北  
虜二十五年烏桓大人來朝南單于遣使詣闕貢獻奉蕃



稱臣、又遣其左賢王擊破北匈奴、却地千餘里、伏波將軍馬援等破武陵蠻於臨沅、叛蠻悉降。二十六年、初作壽陵。帝曰、古者帝王之葬、皆陶人瓦器、木車茅馬、使後世之人不知其處。太宗識終始之義、景帝能述遵孝道、遭天下反覆、而霸陵獨完、受其福豈不美哉。今所制地不過二三頃、無爲山陵陂池、裁令流水而已。二十七年、益州郡徼外蠻夷率種人內屬、北匈奴遣使詣武威、貢獻乞和親。三十年、鮮卑大人內屬朝賀。中元元年、使司空告祠高廟曰、高皇帝與羣臣約、非劉氏不王。呂太后賊害三趙、專王呂氏、賴社稷之靈、祿產伏誅。呂太后不安、配食高廟。薄太后母德、



慈仁孝文皇帝賢明臨國子孫賴福延祚至今其上薄太后尊號曰高皇后配食地祇遷呂太后廟主于園四時二祭二年東夷倭奴國王遣使奉獻二月帝崩在位三十三年年六十二帝每旦視朝日側乃罷數引公卿郎將講論經理皇太子諫曰陛下有禹湯之明而失黃老養性之福願頤愛精神帝曰我自樂此不爲疲也初皇考南頓君爲濟陽令生光武於縣舍有赤光照室是歲縣界有嘉禾生一莖九穗因名曰秀及王莽篡位忌惡劉氏以錢文有金刀故改爲貨泉或以貨泉字文爲白水真人云後望氣者蘇伯阿爲王莽使至南陽遙望見舂陵郭喈曰氣佳哉鬱鬱



鬱蔥蔥然及始起兵還春陵遠望舍南火光赫然屬天有頃不見王者受命信有符乎

### 守成明辟

#### 明帝

明帝莊光武第四子也母陰后明帝十歲能通春秋年三十卽位改元永平永平二年幸辟雍拜三老五更引五更桓榮及弟子升堂上自爲辯說諸儒執經問難於前冠帶薦紳之人圜橋門而觀聽者蓋億萬計上自爲太子受尚書於桓榮及卽帝位猶尊榮以師禮嘗幸太常府令榮坐東面設几杖會百官及榮門生數百人上親自執業諸生



或避位發難上謙曰大師在是帝崇尚儒學自天子諸王  
侯及大臣子弟功臣子孫莫不受經又爲外戚樊氏郭氏  
陰氏馬氏子立學南宮號四姓小侯置五經師搜選高能  
以授其業自期門羽林之士悉令通孝經章句匈奴亦遣  
子入學然性明察好以耳目隱發爲明公卿大臣數被詆  
毀近臣尚書以下至見提曳嘗以事怒郎藥崧以杖撞之  
崧走入牀下帝怒甚疾言曰郎出崧乃曰天子穆穆諸侯  
皇皇未聞人君自起撞郎帝乃赦之是時朝廷莫不悚慄  
唯鍾離意敢諫爭數封還詔書臣下過失輒隨救解帝封  
諸子爲王皆親定封域馬后曰諸子食數縣於制不已儉



乎帝曰我子豈安與先帝子等歲給二十萬足矣自爲東海王時知吏牘墾田之弊旣卽位遵奉建武制度后妃之家不得封侯與政館陶公主爲其子求郎不許而賜錢千萬曰郎官上應列宿出宰百里苟非其人則民受其殃公車以反支日不受章奏帝曰民廢農桑遠來詣闕而復拘以禁忌豈爲政之意乎尚書闔章二妹爲貴人章精力曉舊典久次當遷重職帝以後宮親屬故竟不用是以吏得其人民樂其業遠近畏服戶口滋殖在位十八年而崩悲夫多作數十年皇帝何妨哉

章帝明帝第五子也母賈貴人帝少寬容好儒術顯宗器



重之。元和詔曰：俗吏矯飾外貌，似是而非，朕甚厭之。甚苦之。安靜之吏，惴惴無華，日計不足，月計有餘。如襄城令劉方，吏民同聲謂之不煩。雖未有它異，斯亦近之矣。夫以苛爲察，以刻爲明，以輕爲德，以重爲威，四者或興，則下有怨心。吾詔書數下，冠蓋接道，而吏不加治，民或失職，其咎安在？勉思舊令，稱朕意焉。章和二年，帝崩，年三十一，在位十三年。帝雅好文章，褒崇儒術，立白虎觀，以會諸儒，考詳同異，稱制臨決。如石渠故事，自永平建初之間，公卿大夫至於郡縣之吏，咸選經明行修之人。虎賁衛士皆習孝經，匈奴子弟亦遣入學。三代以還，風化之盛，未有若此者。然帝



厭苛切而過於寬容故外戚寢橫竇后以無子之故譖陷宋貴人動搖東宮廢長立幼東漢之衰自此始矣君道貴剛柔則廢信夫范曄曰魏文帝稱明帝察察章帝長者章帝厭明帝苛切事從寬厚盡心孝道平徭簡賦而民賴其慶謂之長者不亦宜乎李生曰長者無用之名也曷足貴乎況帝王哉一不剛始矣

和帝肅宗第四子也母梁貴人爲竇皇后所譖憂卒竇后養爲己子卽位年十歲永元元年誅竇憲在位十七年和帝初失皇子十數後生者輒隱祕養於民間羣臣無知者及崩乃收皇子於民間長子勝鄧后誣以痼疾少子隆生



始百餘日故迎立爲殤帝延平元年清河王慶就國慶子  
祐年十三太后以帝幼弱畱祐居清河邸殤帝立八月而  
崩鄧后臨朝與鄧騭定策立祐爲嗣焉

安帝祐章帝孫卽位太后臨朝封鄧騭及弟悝弘闡皆爲  
列侯初太后以平原王勝有痼疾而貪殤帝孩抱養爲已  
子及殤帝崩羣臣以勝疾非適意咸歸之太后恐勝終怨  
已乃迎立祐爲帝建光元年太后崩帝少號聰明故鄧太  
后立之及長多不德稍不可太后意太后乃徵河間王子  
翼爲平原懷王後畱京師帝乳母王聖慮有廢置常與中  
黃門李閹江京毀短太后致帝忿懼及太后崩宮人有誣



告太后兄弟惺弘聞謀立平原王者帝怒令有司奏惺等大逆無道盡誅之而以耿貴人兄寶監羽林車騎封宦者江京李閭等皆爲列侯閭后兄弟顯景耀並典禁兵自此宦官弄權外戚用事雖有賢人君子不能救漢祚之衰矣在位十九年崩閭后臨朝又欲久專國柄貪立幼年與顯等定冊迎章帝孫濟北惠王子北鄉侯懿爲嗣閭顯忌宦官樊豐及外戚耿寶風有司奏貶寶爲亭侯寶自殺豐下獄歿王聖母子徙鴈門而以弟景等爲卿校並處權要威福在已

順帝安帝太子母李氏爲閭皇后所害延光三年安帝乳



母王聖大長秋江京中常侍樊豐其構陷太子太子坐廢  
爲濟陰王明年安帝崩北鄉侯立濟陰王時方十歲以廢  
黜不得上殿臨梓宮因悲號不食内外哀之及北鄉侯薨  
閭顯等白太后祕不發喪而更徵立諸王子閉宮門屯兵  
自守中黃門孫程等十九人迎濟陰王卽皇帝位誅閭顯  
等而封程等十九人爲侯在位十九年而崩  
冲帝順帝子年二歲卽位三月而崩梁太后與其兄冀定  
策禁中迎續立之是爲質帝年八歲  
質帝聰慧冀惡之遂弑帝而立志在位一年  
桓帝志蠡吾侯之長子也帝卽位梁冀以外戚專權帝與



宦官單超等謀誅之。自是宦官益橫。雖有黃瓊、陳蕃不學無術而黨錮之禍起矣。在位二十一年。

靈帝解瀆亭侯之子卽位。竇后臨朝。竇武、陳蕃爲政。天下名賢徵列于朝。中外想望太平。旣而陳竇被殺。宦官專權。漢祚終矣。在位二十二年。子辯立。何太后臨朝。袁紹等勒兵入宮。盡誅宦官。董卓遂脇太后廢辯爲弘農王而立陳留王協。

獻帝協。靈帝次子。年九歲卽位。董卓旣誅曹操爲相。進爵魏王。操薨。子丕禪位。以帝爲山陽公。在位三十一年。魏青龍二年崩。壽五十四。自遜位至崩。又十四年。太子早沒。孫



康立五十年薨子瑾立四年薨子秋立二十年永嘉中  
爲胡賊所滅國除爲公共八十九年



三國兵爭

魏

武帝操字孟德沛國譙人也桓帝時曹騰爲中常侍大長秋封費亭侯養子嵩嗣官至太尉嵩本姓夏侯氏嵩生操操少機警有權數而任俠放蕩不治行業好飛鷹走狗其叔父數言之於嵩操患之操後逢叔父於路乃陽敗面喎口叔父謂是中惡風走告嵩嵩驚呼操操口貌如故嵩曰汝叔言汝中惡風有差乎操曰初不中風但失愛於叔耳自後叔有所告嵩終不信于時惟梁國喬玄南陽何顥知操玄謂操曰天下將亂非命世之才不能濟也能安之者



其在君乎。又曰：君未有名，可交。許子將、子將、名郤，與從兄靖俱好，覈論鄉黨人物，每月輒更其品題。故汝南俗有月旦評。操詣郤，問曰：我何如人？郤曰：子治世之能臣，亂世之姦雄也。操大喜而去。靈帝崩，太子卽位，太后臨朝，大將軍何進與袁紹謀誅宦官。太后不聽，進乃召董卓，欲以脅太后。操聞而笑曰：「閹豎之官，古今皆有，但世主不當假之權寵，使至於此。旣治其罪，當誅元惡，一獄吏足矣。何必紛紛召外將乎？欲盡誅之事，必宣露，吾見其敗也。」卓未至而進見殺，卓到廢帝，爲弘農王，而立獻帝。京都大亂，操至陳留，散家財，合義兵，將以誅卓。始起兵於己，吾是歲中平六年。



也。初平元年正月，冀州牧韓馥、豫州刺史孔仙、兗州刺史劉岱、河內太守王匡、渤海太守袁紹、陳畱太守張邈、東郡太守橋瑁、山陽太守袁術、濟北相鮑信同時起兵，衆各數萬，推紹爲盟主。操行奮武將軍，卓聞兵起，乃徙天子都長安，焚燒宮室。是時卓兵彊，紹等莫敢先進。操言：「舉義兵以誅暴亂，大衆已合，諸君何疑？」向使董卓聞山東兵起，倚王室之重，據二周之險，東向以臨天下，雖以無道行之，猶足以爲患。今焚燒宮室，劫遷天子，海內震動，不知所歸，此天亡之時也。一戰而天下定矣。諸將不能用，操兵少，乃詣揚州募兵，得四千餘人。二年，諸將議以幽州牧劉虞宗室賢。



雋欲共立爲主操曰吾等所以舉兵而遠近響應者以義故也今幼主微弱制於奸臣非有昌邑亡國之釁而一旦改易天下其孰安之諸君北面我自西向是時袁紹代韓馥爲冀州牧鮑信謂操曰紹爲盟主因權專利將自生亂是復一卓也且可據大河之南以待其變操善之青州黃巾衆百萬入兗州乘銳轉入東平劉岱欲擊之鮑信諫曰今賊衆百萬百姓皆震恐士卒無鬪志我觀賊衆羣輩相隨軍無輜重唯以抄掠爲資不若畜士衆之力引兵固守彼欲戰不得攻又不能其勢必散我選精銳據其要害擊之可破也岱不聽遂與之戰果爲所殺信乃迎操領兗州



牧而自擊黃巾於壽張東信力戰鬪歿僅而破之購求信  
喪不得衆乃刻木如信形祭而哭焉操追黃巾至濟北受  
降卒三十餘萬男女百餘萬口收其精銳者號爲青州兵  
遂徃征陶謙拔其五城初張邈少時好俠操與之善操之  
攻謙志在必歿以父嵩見害於謙也勅其家曰我若不還  
徃依孟卓孟卓邈字也後還見邈垂泣相對陳畱高柔謂  
人曰曹將軍雖據兗州實有四方之圖未得安守而張府  
君恃陳畱之資將乘間爲變矣鄉人皆以張曹相親不然  
其說已而張邈與陳宮果叛操以迎呂布賴荀彧保鄆城  
程昱說范東阿卒完三城以待操二年操襲定陶呂布夜



走東奔劉備。張邈詣袁術請救。爲其衆所殺。兗州平。建安元年。操軍臨武。是時董卓已爲王允誅滅。允又爲卓將李催、郭汜所殺。長安大亂。車駕復還洛陽矣。操乃將兵詣洛。見天子。董昭等勸操遷都許下。操遂自稱大將軍。迎天子都許昌。時天下亂離。民棄農業。諸軍並起。率乏糧穀。饑則寇略。飽則棄餘。瓦解流離。無敵自破者。不可勝數。袁紹在河南。軍人仰食桑椹。袁術在江淮。取給蒲羸。民多相食。州里蕭條。羽林監棗祗請建置屯田。都尉乃以任峻爲典農中郎將。募民屯田許下。歲得穀百萬斛。於是州郡例置田官。所在積穀。倉廩皆滿。故操征伐四方。無運糧之勞。遂能



兼并羣雄、軍國之饒、起于祗而成于峻也。建安二年、操討  
張綉、三年東征呂布、屠彭城、布將宋憲等執陳宮、舉城降。  
生擒布、宮皆殺之。四年、袁紹旣并公孫瓚、兼四州之地、衆  
十餘萬、至是將進兵攻許。諸將皆恐、操曰、吾知紹之爲人  
矣、志大而智小、色厲而膽薄、忌刻而少威、兵多而分畫不  
明、將驕而政令不一、土地雖廣、糧食雖豐、祗足爲吾奉也。  
五年、車騎將軍董承等稱受帝衣帶中密詔、與劉備共誅  
曹操、謀泄、操殺承等。六年、操將征劉備、諸將皆曰、與公爭  
天下者、袁紹也、今紹方來而棄之、東紹乘公、後若何。操曰、  
劉備、人傑也、今不擊、必爲後患。袁紹雖有大志、而見事遲、



必不動也。逐擊備破之。備走奔紹。獲其妻子。備將關羽屯下邳。復進攻之。羽降。操還官渡。紹卒不出。卒破紹。斬其二將。顏良、文醜。七年。操軍譙。使以太牢祀喬玄。復進兵官渡。紹自軍破。嘔血歿。少子尚代譚將軍。軍黎陽。九月。操征之。八年。袁譚、袁尚夜遁。操進軍鄴。九年。操攻鄴。十年。攻譚破之。斬譚。冀州平。袁熙與尚奔三郡烏桓。操征烏桓。十一年。五月。操至無終。秋七月大水。傍海道不通。田疇請爲鄉道。引軍出盧龍塞。塞外道絕。乃塹山堙谷五百餘里。經白檀。歷平剛。涉鮮卑庭。東指柳城。尚熙與蹋頓等將數萬騎逆軍。操登白狼山。張遼爲先鋒。斬蹋頓及名王以下。尚與熙



奔遼。初，遼東太守公孫康恃遠不服。及操破烏桓，或說操遂征之。操曰：「吾方使康斬送尚、熙首來，不煩兵矣。」九月，操引兵自柳城還。康卽斬尚、熙及速僕丸等，傳其首。諸將問操，操曰：「彼素畏尚等，吾急之則并力，緩之則相圖，其勢然也。」十二年，至易水，代郡烏桓及上郡烏桓行單于等將其名王來賀。十三年，南征劉表，至赤壁，與劉備等戰，不利。於是軍大疫，多歿，乃引還。劉備遂有荊州、江南諸郡。十四年，軍至譙，作輕舟，治水軍。自渦入淮，出淝水，軍合肥。十五年春，下令曰：「自古受命之君，曷嘗不得賢人君子與之共治，及其得賢，曾不出問巷，豈幸相遇哉？上之人不求之耳。今



天下未定此求賢之急時也。孟公綽爲趙魏老則優不可  
以爲滕薛大夫若必廉士而後可用則齊桓其何以霸世。  
今天下得無被褐懷玉而釣渭濱者乎。又得無盜嫂受金  
而遇魏無知者乎。二三子其佐我揚明側陋唯才是舉吾  
得而用之。是冬作銅雀臺於鄴。十六年張魯據漢中操遣  
鍾繇討之而使夏侯淵等出河東與繇會。是時關東諸將  
疑繇欲見襲馬超遂與韓遂等叛。操於是遣曹仁討超。超  
等屯潼關。操敕仁等曰。關西兵精唯堅壁勿與戰。八月操  
親至潼關與超等夾關而軍。操急持之。而潛遣徐晃朱靈  
等夜渡蒲坂津據河西爲營。操自潼關北渡臨濟河先渡



兵獨與都尉許楮及虎士百餘人畱南岸斷後。超將步騎萬餘來奔操軍。矢下如雨。楮乃扶操上船。賊戰急。軍爭濟。船重欲沒。楮斬攀船者。左手舉馬鞍蔽操。船工爲流矢所中。死。楮右手並泝船。是日微楮幾危。校尉丁裴因放牛馬餌賊。賊取牛馬。操乃得渡。循河爲甬道而南。賊退拒渭水。操乃多設疑兵。潛以舟載兵入渭。爲浮橋。夜分。兵結營於渭南。韓遂與操有舊。請與操相見。操欲離其黨。於是交馬相語。移時共道京都舊故。拊手歡笑。時秦胡觀者前後重沓。操笑謂之曰。爾欲觀曹公乎。亦猶人也。非有四目兩口。但多智耳。超果疑。遂卒爲操所破。及關中平。諸將問操曰。



賊初守潼關渭北道缺不從河東擊馮翊而反守潼關引兵而後北渡何也操曰賊守潼關若吾入河東賊必引守諸津則西河未可渡也吾故盛兵向潼關賊悉衆南守西河之備虛故二將得擅取西河然後引兵北渡賊不能與吾爭西河者以有二將之軍也連車樹柵爲甬道而南旣爲不可勝且以示弱渡渭爲堅壘虜至不出所以驕之也故賊不爲營壘而求割地吾順言許之所以從其意使自安而不爲備因畜士卒之力一旦擊之所謂疾雷不及掩耳兵之變化固非一道也始賊每一部到操輒喜賊破後或問操操答曰關中長遠若賊各依險守阻不一二年不



可定也。今皆來集。其衆雖多。莫相歸服。軍無適主。一舉可滅。爲功差易。吾是以喜。十七年十月。操征孫權。十八年正月。進兵濡須口。破權江西營。獲其都督公孫陽。乃還。四月。至鄴。五月。操自立爲魏公。加九錫。始建魏社稷宗廟。安定太守母丘興將之官。操戒之曰。羗胡欲與中國通。自當遣人來。慎勿遣人往。善人難得。必將教羗胡妄有所請求。因欲以自利。不從。便爲失異俗意。從之。則無益於事。興至官。果遣校尉范凌往羗中。凌果教羗使自請爲屬國都尉。操曰。吾預知當爾。非聖也。但更事多耳。十九年。立皇子熙等四人爲王。時許靖在巴郡。聞之。笑曰。將欲翕之。必姑張之。



將欲奪之、必姑與之、其孟德之謂乎、七月征孫權、參軍傳  
幹諫不聽、操自合肥而還、十一月、操遣華歆、勒兵入宮、收  
伏皇后、殺之、伏完及宗族死者數百人、十二月、操至孟津、  
天子命置旄頭、宮殿設鍾虡、乙未、下令曰、夫有行之士、未  
必能進取、進取之士、未必能有行也、陳平豈篤行、蘇秦豈  
守信耶、而陳平定漢業、蘇秦濟弱燕、由此言之、士有偏短、  
庸可廢乎、又曰、刑、百姓之命也、今典獄者、或非其人、而任  
以三軍、死生之事、吾甚懼之、其選明達法理者、使持典刑、  
於是、以高柔爲理曹掾、舊法、軍征士亡者、竟其妻子而亡  
者、猶不息、操欲更重其刑、并及其父母兄弟、柔啓曰、士卒



亡軍誠在可疾然竊聞其中時有悔者愚謂乃空貸其妻  
子以誘其還心猥復重之柔恐自今軍士見一人逃亡誅  
將及已亦且相隨而走不可復殺也此重刑非所以止亡  
乃所以益走耳操稱善久之二十年西征張魯魯降封魯  
及其五子皆爲列侯二十一年操進爵爲魏王十月治兵  
征孫權二十二年操軍居巢孫權在濡須口築城拒守三  
月操引軍還二十三年金祿耿紀等欲挾天子以攻魏未  
成而敗操聞之怒召漢百官詣鄴盡殺救火居左者二十  
四年西曹掾魏諷謀襲鄴誅操不克歿之是年孫權將呂  
蒙襲斬關羽操表權爲驃騎將軍荊州牧上書稱臣於操



操以權書示中外曰是兒欲踞吾著爐火上耶侍中陳羣等陳說天命操曰若天命在吾吾其爲周文王矣二十五年正月操至洛陽薨年六十六操芟夷羣醜其行軍用師大較依孫武子兵法而因事設奇譎敵制勝變化若神自作兵書十餘萬言諸將征伐皆以新書從事與虜對陣意思安閒如不欲戰然至決機而乘氣執盈溢故每戰必克御軍三十餘年手不舍書漢世安平崔瑗瑗子寔弘農張芝芝弟昶並善草書而操亞之桓譚蔡邕善音樂馮翊山子道王九真郭覬等善圍碁操皆與埒能又習啖野葛至一尺少多飲鵠酒獻穆后諱節操之中女也建安十八年



操進三女憲節華爲夫人及伏后被弑節立爲皇后曹丕受禪遣人求璽綬后怒不與如是數輩后乃呼入親數讓之以璽抵軒下因涕泣詈曰天不祚爾嗚呼誰知此詈遂成讖也漢獻貶帝爲公以后爲山陽公夫人相傳至玄孫秋猶爲公行漢正朔用天子禮樂未絕也永嘉不兢氏羗並起司馬晉已失天下況魏乎嗚呼又誰知漢以公相傳又且幾百年而魏之不祚一至此也西晉已亡而後漢之祀絕則漢之祀有五百餘年其末代如周之寄食東西而又勝之矣深仁厚澤之報何如哉故有國者不可以急於取國而恣爲勦絕撲滅之威以自擅而圖後禍也本欲爲



慮後之圖。孰知後禍更速乎。魏武司馬懿是已。魏武好殺。其子丕先殺其弟禁。錮其宗。其餘盡夷滅於司馬懿之手。無孑遺者。司馬懿好殺。又多殺曹。奪國未幾。而司馬炎二十。五子咸自相啖。不盡者。懷愍二君。總奴虜斬截於羗胡矣。天之報施。竟何如哉。天道好還。人不可以獨殺諒哉。余故謂曹后。天不祚爾之言。有驗也。

文帝諱丕。代漢都鄴。徙洛陽。首立九品官人之法。在位七年。壽四十。臨終。以司馬懿受遺詔輔政。好貨丕同母弟植好學。多才。見寵於武帝。幾奪嫡。而丁儀。丁廙。楊修等與植善。又爲之羽翼。故文帝立而怨之。殺丁儀。丁廙。及其男口。植與



諸兄弟並遣就國。夫怨植已矣，並及諸兄弟，何也？故下太后親告，不曰：「女既殺我，任城不得復害東阿。」東阿，植也。黃

灌均○見孫千古同用

初二年，監國謁者灌均希指，奏植醉酒悖慢，劫脅使者，不以太后故，貶爵爲安鄉侯。其年，又改封鄆城侯。其餘侯王皆寄名空地而無其實。老兵百餘人爲之守備，隔絕千里之外，不聽朝覲。雖有侯號，實同匹夫。皆願爲布衣而不能得。法旣峻急，伺察者益衆。故諸侯王過惡，日聞。獨北海王衮謹身好學，未嘗有過。監國防輔相與言曰：「受詔察王，有過當奏。有善亦宐以聞。」遂共表陳之。衮聞大驚曰：「修身自守，常人之行耳。而諸君乃以上聞，是適足以增其負累也。」

○惜○哉○史○失○其○名○



孫盛曰、異哉魏之封建也、不度先王之典、不思藩屏之重、違敦睦之風、背維城之義、漢初之封、或權侔人主、雖云不度、時勢然也、魏氏諸王、陋同匹夫、雖懲七國、矯枉過也、六合未一、而彫翦枝幹、委權異俗、勢同庖木、危若巢幕、不嗣忽諸、非天喪也、五等之制、萬世不易、六代興亡、曹叅論之詳矣、余謂曹公屠鄴、丕卽入熙室而奪其妻、使曹公有今年破賊爲阿奴之嫌、卞太后徃問丕疾、見左右皆昔年侍者、因問左右何時過、對云、正伏魄時過、太后遂不入而罵曰、狗鼠不食女餘、死固應爾、至山陵亦竟不臨、然則丕之喪心久矣、又何有於諸王、又何有於經國之長慮乎、縱無



司馬懿之奸亦難久有魏也而況司馬父子兄弟終日睨其側哉

明帝獻丕子臨終以曹爽爲大將軍與司馬懿同受遺詔輔政在位十四年

邵陵厲公芳獻養子也卽位三年而司馬懿卒子師繼爲大將軍六年而師殺中書令李豐及太常卿夏侯玄遂廢芳而迎高貴鄉公髦立之

髦丕之孫司馬師卒弟昭繼爲大將軍髦見威權日去不勝其忿率兵討昭爲昭所弑在位七年

長道鄉公奐操孫也司馬昭弑髦而立之昭卒子炎嗣爲



晉王篡魏廢奐爲陳畱王在位七年而魏絕魏之前後五  
帝共享國四十一年其一被弑其二見廢唯丕與叡僅存  
然則魏武亦枉苦心矣本欲滅吳并蜀以一天下孰知吳  
蜀未滅而已先滅耶又豈料俯仰之間四十餘年蕩然遂  
無復有耶已取天下於人若此其難人取天下於已若此  
其易難易之故吾知雖以曹公之多智亦必不能逆爲之  
籌矣可不悲歟奐在位七年虛器也髦在位七年身且不  
保求爲虛器又不能得也芳雖在位六年乃廢然實他人  
子非魏物也其與司馬晉之爲牛羸秦之爲呂等耳未絕  
而先自絕矣然則自魏明帝而後稱魏帝者空有帝之名



無帝之實也。吾又以是觀之。丕七年。獻十四年。是魏之有天下也。實則僅僅二十又一年也。只有二代相繼而爲帝也。魏武不亦枉哉。而苦心乎哉。悲夫。



此。膝。近。不。衣。珉。而。苦。心。平。時。悲。夫。

天。不。也。實。限。對。對。二。十。天。一。年。也。只。休。二。分。休。而。無。帝。之。實。也。吾。人。以。其。賺。之。不。也。年。而。十。四。年。其。賺。之。不。

其。易。難。易。之。故。吾。知。雖。以。曹。公。之。名。教。亦。必。不。能。也。其。賺。之。不。也。年。而。十。四。年。其。賺。之。不。



吳

孫堅，富春人也。董卓亂，堅舉兵荊州，與袁術相結。術表堅行破虜將軍，領豫州刺史，轉戰至梁，大破卓軍。卓尋徙都，焚燒雒邑。堅乃前至洛，修諸陵，平塞卓所發掘。初平三年，術使堅征劉表。表遣黃祖逆于樊鄧之間，堅擊破之，追渡漢水，遂圍襄陽。單馬行峴山，爲祖軍士所射殺。初，堅娶錢塘吳氏，生四男：策、權、翊、匡，及一女。堅從軍于外，畱家壽春。策年十餘歲，已交結知名士矣。舒人周瑜與策同年，自舒來造，勸策徙居舒。策從之。瑜乃推道南大宅與策，及堅死，策年十七，策乃渡江，居江都，結納豪傑，慨然有復讐之志。



後策到壽春見袁術涕泣言曰亡父昔從長沙入討董卓與明使君會于南陽同盟結好不幸遇難勲業不終策感惟先人舊恩欲自憑結願明君垂察其誠術甚奇之以堅餘兵千餘人還策拜表懷義校尉因進攻橫江當利皆拔之遂渡江轉鬪所向皆破莫敢當其鋒初百姓聞孫郎至皆失魂魄長吏委城郭竄伏山草及策至軍士奉令不敢擄掠雞犬菜茹一無所犯民乃大悅競以牛酒勞軍策爲人美姿顏能笑語性闊達善用人旣又攻劉繇於牛渚營又破繇別將於梅陵轉攻湖熟江乘皆下之進擊繇曲阿繇同郡太史慈時自東萊來省繇會策至繇使慈出徃偵



視慈時獨與一騎卒遇策於神亭策從騎十三皆堅舊將  
慈便前鬪策刺慈馬而掣得慈項上手戟慈亦得策兜鍪  
會兩家兵騎並至乃各解散後繇兵敗走丹陽策入曲阿  
勞賜軍士旬月之間四面雲集得見兵二萬餘人馬千餘  
疋策於是威震江東建安元年策將取會稽會稽功曹虞  
翻說太守王朗曰策善用兵不如避之朗不從發兵拒策  
遂爲策所破朗降策自領會稽太守復以虞翻爲功曹策  
好獵虞翻諫曰明府喜輕出微行從官不暇嚴白龍魚服  
困于豫且白蛇自放劉季害之策曰君言是也然不能改  
策嘗爲涇縣大帥祖郎所襲幾至危殆劉繇之奔也太史



慈遁於蕪湖山中、自稱丹陽太守、策已定宣城、惟涇以西六縣未服、慈因進任涇縣、大爲山越所附、於是策自將討祖郎於陵陽、擒之、策謂郎曰、爾昔襲孤、斫孤馬鞍、今創軍立事、除棄宿恨、惟取能用、天下通耳、非但汝、汝勿恐怖、卽破械署門、下賊曹、又討太史慈於勇里、擒之、解縛、捉其手曰、寧識神亭時耶、今日之事、當與卿共之、卿天下智士、但所託未得其人、孤是卿知己、勿憂不如意也、卽署門下督軍、還祖郎、太史慈俱在前道、會劉繇卒於豫章、士衆萬餘人、欲奉豫章太守華歆爲主、歆謝遣之、衆未有所附、策命太史慈先往安撫、并觀華子魚之爲人、左右皆曰、慈必不



還策曰子義舍我當欲從誰餞送昌門把腕別曰何時能  
還荅曰不過六十日慈行議者猶云策曰太史子義氣勇  
有膽烈非縱橫人也其秉心道義重然諾一以意許知已  
死亡不相負諸君幸勿言慈果如期而反四年冬策以計  
攻廬江太守劉勲破之遂進擊黃祖十二月策軍至沙羨  
劉表子虎及南陽韓晞將長矛五千人來救祖策與戰大  
破之斬晞祖脫身走策盛兵將徇豫章屯于椒丘謂功曹  
虞翻曰華子魚自有名字然非吾敵也若不開門讓城金  
鼓一震不能無傷卿便在前具宣孤意翻乃往見華歆歆  
卽作檄遣使齎迎歆自葛巾迎策策向歆拜禮爲上賓遂



有豫章初策殺吳郡太守許貢貢奴客潛民間欲爲貢報讐策性好獵所乘馬精駿從騎絕不能及卒遇貢客三人射策中頰策創甚名張昭等謂曰中國方亂以吳越之衆三江之固足以觀成敗公等善相吾弟呼權佩以印綬謂曰舉江東之衆決幾於兩陣之間與天下爭衡卿不如我舉賢任能各盡其心以保江東我不如卿五月夏策卒年二十六時策雖有會稽吳郡丹陽豫章廬江廬陵然深險之地猶未盡從流寓之士皆以安危去就爲意獨張昭周瑜等謂權可與共成大業七年秋曹操下書責孫權任子權引周瑜詣吳夫人前定議遂不送質十三年權西擊黃



祖屠其城、祖挺身走、追斬之。是時曹操遺權書曰：「近者奉辭伐罪，旌麾南指，劉琮束手。今治水軍八十一萬衆，願與將軍會獵於吳。」權以示臣下，莫不駭震失色。權用周瑜、魯肅計，與劉備并力，破操於赤壁。操大敗，十五年冬，周瑜卒。十七年，權作石頭城，徙治秣陵，改秣陵爲建業。秋九月，作濡須塢。冬十月，曹操東擊孫權。十八年春，曹操進軍濡須口，號步騎四十萬，攻破孫權江西營。權率衆士往禦之，相守月餘。操見其舟船器仗，軍伍整肅，歎曰：「生子當如孫仲謀！」如劉景昇兒子豚犬耳。權爲牋與操，說春水方生，公宜速去。又別紙言：「足下不死，孤不得安。」操與諸將曰：「孫權不欺。」

○英○雄○

○可○傷○



乃引兵還。二十二年春，魏王操軍於居巢。孫權保濡須，操進攻之。三月，操又引軍還。冬十月，魯肅卒。孫權以呂蒙兼漢昌太守代之。二十四年秋，權遣呂蒙襲公安江陵，獲關羽及子平於章鄉，斬之。十二月，魏王操表孫權爲驃騎將軍，假節領荊州牧，封南昌侯。魏王不黃初元年，孫權遣使奉獻。二年，孫權自公安徙都鄂，更名鄂曰武昌。秋七月，孫權遣使稱臣于魏。魏遣太常邢貞奉策，卽拜孫權爲吳王。吳中郎將徐盛忿顧謂同列曰：「盛等不能奮身出命爲國，家并許洛吞巴蜀，而令吾君與貞盟，不亦辱乎？」因涕泣橫流。貞聞之，謂其徒曰：「江東將相如此，非久下人者也。」吳王



遣中大夫南陽趙咨入謝。魏主問曰：「吳王何等主也？」對曰：「聰明、仁、智、雄、略之主也。」魏主問其狀。對曰：「納魯肅於凡品，是其聰也；拔呂蒙於行陣，是其明也；獲于禁而不害，是其仁也；取荊州，兵不血刃，是其智也。據三州，虎視天下，是其雄也；屈身於陛下，是其略也。」魏主曰：「吳可征否？」對曰：「大國有征伐之兵，小國有禦備之固。」魏主曰：「吳如大夫幾人？」對曰：「聰明特達者八九十人，如臣之比，車載斗量，不可勝數。」魏明帝泰和三年，吳王卽皇帝位，大赦，以黃龍見，改元黃龍。九月，遷都建業，以陸遜輔太子登，守武昌。黃龍二年，明年又改嘉禾。三年、六年，以赤烏見于前殿，改元赤烏。是年，



魏主叡卒太子芳立十三年吳主廢其太子和立子亮爲太子太元二年權薨年七十一

孫亮權少子權以宗室孫綝爲大將傳亮亮卽位以綝專恣陰與太常全尚將軍劉丞謀誅綝綝以兵取尚又攻殺丞于蒼龍門黜亮爲會稽王尋殺之在位七年

孫休權第六子綝廢亮立休休以綝爲丞相綝一門五侯皆與禁兵權傾人主休陰與張布圖計臘日百僚朝賀詔武士縛綝卽日伏誅在位七年

孫皓休兄和子滯虐殊甚每宴群臣咸令沉醉置黃門郎十人以司過失宴罷各奏闕失過大卽加威刑小過亦輒



罪、又激水入宮、宮人稍不合意、輒流殺之、或剝人之面、或鑿人之眼、又惡人視已、群臣莫敢舉目、丞相陸凱曰、君臣一體、無有不相識者、若猝有不虞、恐不知所赴也、後降晉、封爲歸命侯、在位十七年。



佳然報命并其封平

一豔無林不厭歸來春春不真恐不味而扶出對面看

總入文即又恐人嫌因無耳其嫌舉目丞相到臨曰真

果又為木人可官人嫌不合意轉飛蝶文如餘人之面



蜀

先主劉備，涿郡人，景帝子中山靖王之後也。少孤貧，與母以販屨爲業。身長七尺五寸，垂手下膝，顧自見其耳。常與公孫瓚同師盧植，由是往依瓚。瓚以爲平原相常山趙雲來詣瓚，備見而奇之。雲遂從備。興平元年，徐州牧陶謙疾篤，謂別駕東海糜竺曰：「非劉備不能安此州也。」謙卒，竺率州人迎備。備遂領徐州。建安元年，袁術攻劉備以爭徐州，備使張飛守下邳，自將拒術。袁術與呂布書，勸令襲下邳。布乃引兵水陸東下，張飛敗走布。遂虜備妻子，備請降布。布亦忿袁術，乃召備，復以爲豫州刺史，與并勢擊術。使屯



小沛。備因合兵得萬餘人。布惡之。乃復攻備。備敗走歸曹  
操。操厚遇之。以爲豫州牧。遂益其兵。給糧食。使東至沛。收  
散兵以圖布。三年。呂布復與袁術通。遣其將高順及張遼  
攻劉備。曹操遣將夏侯惇救之。爲順等所敗。順等破沛城。  
虜備妻子而還。備復走。操謂備曰。今天下英雄。惟使君  
與操耳。本初之徒。不足數也。備方食。值雷震。失匙箸。備因  
曰。聖人云。迅雷風烈。必變。良有以也。會操遣備邀袁術。術  
旣南走。備遂殺徐州刺史車胄。留關羽守下邳。身還小沛。  
郡縣多叛。操爲備。備將數萬人。遣使與袁紹連兵。操遂自  
擊。備破之。獲其妻子。進拔下邳。擒關羽。備乃奔青州。因袁



譚以歸袁紹。紹聞備至，身去鄴二百里迎之。五年秋，劉備略汝潁之間，還至紹軍，陰欲離紹。紹乃遣備將本兵，復至汝南。六年秋，操自擊備於汝南。備奔劉表。表聞備至，自出郊迎，以上賓禮待之，益其兵，使屯新野。備後在荊州數年，一日至廁所，慨然流涕，表怪問故。備曰：「平常身不離鞍，髀骨皆消，今不復騎，髀裏肉生，日月如流，老將至矣，而功業不建，是以悲耳。」十三年，操軍至新野，劉琮以荊州降。琮表子也。諸葛亮勸備攻琮，以取荊州。備曰：「劉荊州臨亡，託我以孤遺，背信自濟，吾所不爲。」遂去，過襄陽。琮左右及荊州人多歸備，比到當陽，衆十萬餘，輜重數千兩，日行不過十



餘里、或謂備曰、宜速行保江陵、備曰、夫濟大事、必以人爲本、今人歸吾、吾何忍去、操以江陵有軍實、恐備據之、乃釋輜重、將精騎五千急追備、一日一夜行三百餘里、追及備於當陽之長坂、備棄妻子、與諸葛亮、張飛、趙雲等數十騎遁去、或謂備曰、趙雲北走矣、備以手戟摘之、曰、子龍不棄我也、頃之、雲抱劉禪與關羽船會、因得濟沔、備遂因魯肅以歸孫權、與權共破操於赤壁、十二月、備引兵南徇武陵、長沙、桂陽、零陵諸郡、皆降、備以諸葛亮爲軍師、使督零陵、桂陽、長沙三郡、調其租稅以充軍實、以趙雲爲桂陽太守、十四年冬、孫權以備領荊州牧、周瑜分南岸地以給備、備



立營於油口改名公安權復以妹妻備十五年冬劉表故  
吏士多歸備備以周瑜所給地少不足容衆乃自詣京見  
孫權求都督荊州周瑜勸留之權不聽備還公安聞之嘆  
曰天下智謀之士所見略同時孔明諫孤莫行其意亦慮  
此也及周瑜卒魯肅代瑜肅乃勸權以荊州借備與共拒  
曹操十六年冬曹操遣鍾繇向漢中蜀州牧劉璋別駕張  
松說璋曰曹公兵無敵于天下若因張魯之資以取蜀土  
誰能禦之劉豫州使君之宗室若使之討魯魯必破矣魯  
破則益州強曹公雖來無能爲也璋然之乃遣法正迎備  
法正至荊州遂勸備取益州龐統亦言於備備曰今指與

亦是

大是

亦○是○無○了○周○瑜○矣○



吾爲水火者曹操也操以急吾以寬操以暴吾以仁操以  
譎吾以忠每與操反事乃可成今以小利而失信義于天  
下奈何統曰逆取順守古人所貴若事定之後封以大國  
何負於信今日不取終爲人利耳備以爲然乃將步卒數  
萬人入益州劉璋敕在所供奉備備入境如歸前後贈遺  
以巨億計備至巴郡太守嚴顏拊心嘆曰此所謂獨坐窮  
山放虎自備者也備至涪璋率步騎三萬餘人車乘帳幔  
精光耀日往會之張松令法正白備便於會襲璋備曰此  
事不可倉卒璋與備歡飲百餘日璋增備兵厚加資給使  
擊張魯又令督白水軍備并軍三萬餘人北到葭萌未卽



討魯厚樹恩德以收衆心十七年冬備在葭萌十八年夏  
備進據涪城十九年備進圍成都璋出降備自領益州牧  
以諸葛亮爲軍師將軍於是董和黃權李嚴等本璋之所  
授用也吳懿等璋之婚親也彭義璋之所擯棄也劉巴宿  
昔之所怨恨也備皆處之顯任盡其器能有志之士無不  
競勸益州之民是以太和初赤壁之役權遣使報備曰張  
魯王巴漢爲曹操耳目規圖益州若操得蜀則荊州危矣  
今欲先攻取璋進討張魯首尾相連一統吳楚雖有十操  
無所憂也於是遂遣周瑜率水兵住夏口○大○是○備不聽軍過謂  
瑜曰汝欲取蜀吾當被髮入山不失信于天下也及備取



益州、權聞之、怒曰、猾虜乃敢挾詐如此、二十年、孫權以備  
已得益州、乃遣呂蒙襲奪長沙、零陵、桂陽三郡、備引兵五  
萬下公安、令關羽入益陽、是歲、曹操將擊張魯、備聞之、乃  
與權連和、分荊州、江夏、長沙、桂陽、東屬南郡、零陵、武陵、西  
屬、引兵還江州、二十三年夏、備屯陽平關、魏大將夏侯淵  
督張郃、徐晃等與備相拒、備遣絕馬鳴閣道、徐晃擊破之、  
郃屯廣右、備又攻之、不能克、乃急書發益州兵、諸葛亮以  
問從事、犍爲楊洪、洪曰、漢中、益州咽喉、若無漢中、則無蜀  
矣、此家門之禍也、發兵何疑、二十四年春、操自長安出斜  
谷、軍遮要以臨漢中、備曰、曹公雖來、無能爲也、我必有漢



小矣。乃歛衆拒險，終不交鋒。操運米北山下，黃忠引兵取之。過期不還，趙雲將數十騎出營視之。值操揚兵大出，雲卒與相遇，遂前突其陣，且鬪且却。魏兵散而復合，追至營下。雲入營，便大開門，偃旗息鼓。魏兵疑雲有伏，引去。雲令搥鼓，以勁弩隨後追射。魏兵驚懼，自相蹂踐，盡墮漢水中。備明日自來雲營視其戰處，曰：「子龍一身都是膽也。」操與備相守月餘，魏軍士多亡。夏五月，操引兵出漢中，諸軍還長安。劉備遂有漢中。秋七月，劉備自稱漢中王，立子禪爲太子。是年，孫權襲殺關羽，取荊州。魏文帝黃初二年春，蜀中傳言漢帝已遇害，於是漢中王發喪制服。夏四月，



漢中王卽帝位於武擔之南大赦改元章武初先主忿孫  
權襲關羽至是遂帥諸軍伐吳竟爲陸遜所敗三年夏先  
主薨于永安宮時年六十三矣遺詔敕後主曰人五十不  
稱夭吾年六十有餘何所復恨但以卿兄弟爲念耳勉之  
勉之勿以小惡而爲之勿以小善而勿爲此豈宜與泥塑上語惟賢惟德可以  
服人聞丞相爲寫申韓管子六韜一通已畢吾亡之後汝  
兄弟父事丞相可也

後主禪嗣位丞相諸葛亮受遺詔輔政亮卒當得起宦官黃皓用

事及司馬昭遣鄧艾鍾會伐蜀禪遂降禪子北地王諶怒  
曰若理窮力屈禍敗必及便當父子君臣背城一戰同死當時何不立諶



社稷以見先帝可也。後主不納，遂送璽綬。是日，譙哭於昭烈之廟。可○敬○先殺妻子而後自殺。禪至洛陽，封爲安樂公司馬。昭與禪宴，爲之作故蜀歌，旁人皆爲之感愴。而禪喜笑自若。昭謂賈充曰：「人之無情，乃至於是乎？」雖使諸葛亮在，不能輔之久矣。全可○見○況姜維耶？他日，昭問禪曰：「頗思蜀否？」禪曰：「此間樂不思蜀。」郤正聞之，語禪曰：「後若問，宜泣答曰：「先人墳墓遠在隴蜀，乃心西悲，無日不思。」○真○可○人○卽閉其目。會復問，禪對如之。昭曰：「何乃似郤正語邪？」禪驚視曰：「誠如尊命。」







奸臣篡奪

晉司馬氏

共五十三年

武帝炎司馬昭長子也昭師之弟而司馬懿之子懿字仲達河內溫縣人少有奇節建安六年郡舉上計掾曹操爲司空聞而辟之懿辭以風痺操爲丞相又辟爲文學掾敕行者曰若復盤桓便收之懿懼乃就職於是使與太子游處遷黃門侍郎魏國旣建遷太子中庶子與陳羣吳質朱鑠號曰四友及操薨于洛陽懿乃奉喪還鄴操子丕嗣懿轉丞相長史及丕代漢以懿爲御史中丞黃初七年文帝病篤懿與曹真陳羣等並受顧命輔政明帝卽位詔懿屯



于宛加督荊象二州諸軍事初孟達之降也魏朝遇之甚厚懿以達言行傾巧不可任魏主不聽乃以達領新城太守封侯假節達於是連吳固蜀潛圖中國蜀相諸葛亮惡其反覆又患其爲患達與太守申儀有隙亮欲促其事乃遣郭模詐降過儀因漏泄其謀達聞其謀泄將舉兵懿恐其速發急以書喻達曰將軍昔棄劉備託身國家國家委將軍以疆場之任任將軍以圖蜀之事可謂心貫白日蜀人愚智莫不切齒於將軍諸葛亮欲相破惟苦無路耳摸之所言非小事也亮豈輕之而令宣露此殆易知耳達得書大喜猶豫未決懿乃潛軍倍道兼行八日到其城



下初達與亮書曰宛去洛八百里去吳一千二百里聞吾舉事當表上天子比相反覆一月間也則吾城已固諸軍足辦司馬公必不自來諸將來吾無患矣及兵到達又告亮曰吾舉事八日而兵至城下何其神速也至是竟斬達首傳京師俘獲萬餘人振旅還宛大和四年諸葛亮入天水詔懿西屯長安督永梁二州諸軍事統軍騎將軍張郃雍州刺史郭淮等拒亮張郃勸懿分軍任雍郿爲後鎮懿曰料前軍獨能當之者將軍言是也若不能當而分爲前後此楚之三軍所以爲黥布擒也遂進軍隄麋亮聞大軍且至乃自帥衆將芟上邽之麥諸將皆懼懿曰亮慮多決



少必安營自固、然後芟麥、吾得二日兼行足矣、於是卷甲晨夜赴之、亮望塵而遁、懿曰、吾倍道疲勞、此曉兵者之所貪也、亮不敢據渭水、此易與耳、進次漢陽、與亮相遇、懿列陣以待之、亮宵遁、追擊破之、俘斬萬計、明帝使使者勞軍、加增封邑、時軍師杜襲等皆言、明年麥熟、亮必爲寇、隴右無穀、空及時搬運、懿曰、亮再出祁山、一攻陳倉、挫衄而反、縱其後出、不復攻城、當求野戰、必在隴東、不在西也、亮每以糧少爲恨、歸必積穀、以吾料之、非三稔不動矣、青龍二年、亮又帥衆十餘萬、出斜谷、壘于郿之渭水南原、明帝憂之、遣征蜀護軍秦朗督步騎二萬、受懿節度、諸將欲往渭



北懿曰、百姓積聚、皆在渭南、遂引軍而濟、背水爲壘、因謂諸將曰、亮若勇者、當出武功、依山而東、若西上五丈原、諸軍無事矣、亮果上五丈原、將北渡渭、懿遣將軍周當屯陽遂、以餌之、數日、亮不動、懿曰、亮欲爭原、而不向陽遂、此意可知也、遣將軍胡遵、雍州刺史郭淮、共備陽遂、與亮會於積石、臨原而戰、懿以亮僞軍遠寇、利在急戰、故亮數挑戰、懿終不出、亮因遺懿巾幘婦人之飾、懿怒、表請決戰、明帝不許、乃遣衛尉辛毗杖節爲軍師以制之、後亮復來挑戰、懿將出兵、毗杖節立軍門、懿不得出、乃止、初、蜀將姜維聞毗來、謂亮曰、辛毗杖節而至、賊不復出矣、亮曰、彼本無戰



心所以固請者、以示武於其衆耳。將在軍、君命有所不受、苟能制吾、豈千里而請戰邪？懿與亮對壘百餘日、會亮病卒、諸將燒營遁去。懿乃行其營壘、觀其遺事、獲其圖書糧穀、嘆曰：「天下奇才也！」辛毗以爲亮未必死、懿曰：「軍家所重、軍書密計、兵馬糧穀、今皆棄之、豈有人捐其五臟而可以生乎？宜急追之。」關中多蒺藜、懿使軍士二千人著軟材平底木屐前行、蒺藜著屐、然後馬步俱進、追到赤岸、乃知亮果死、百姓爲之諺曰：「死諸葛、走生仲達。」懿聞而笑曰：「吾便料生不便料死故也。」先是亮使至、懿問曰：「諸葛孔明起居何如？」食可幾米？對曰：「三四升。」問政事、曰：「二十罰已上、皆自



省覽懿告人曰諸葛孔明食少事煩其能久乎及遼東太  
守公孫淵反帝乃徵懿詣京師問曰君度其作何計懿對  
曰棄城預走上計也據遼水以距大軍次計也坐守襄平  
此成擒耳今其計將安出懿對曰惟明者能深度彼已預  
有所棄此非其所及也曰徃還幾時對曰徃百日還百日  
攻百日以六十日爲休息一年足矣遂進師淵果遣步騎  
數萬阻遼隧堅壁而守以距懿懿盛兵多張旗幟出賊之  
南賊盡銳赴之懿乃泛舟潛濟以出其北又傍遼水作長  
圍欲向襄平諸將曰不攻賊而作圍非所以示衆也懿曰  
賊堅營高壘欲以老吾兵也攻之正入其計此王邑所以



耻過昆陽也。古人曰：敵雖高壘，不得不與我戰者，攻其所必救也；賊大衆在此，則巢窟虛矣。我直指襄平，則人懷內懼，懼而求戰，破之必矣。遂整陣而過。賊見兵出其後，果邀之。懿乃縱兵逆擊，大破之。三戰皆捷。賊保襄平，進軍圍之。初，淵聞魏師之出也，請救於孫權。權遣淵書曰：司馬公善用兵，變化若神，所向無前，深爲弟憂之。會霖潦大水平，地數尺，三軍恐欲移營。懿令軍中敢有言徙者，斬。賊恃水樵牧自若。諸將欲取之，皆不聽。司馬陳珪曰：昔攻上庸，八部並進，晝夜不息，故能旬之半拔堅城。斬孟達，今者遠來而更安緩，何也？懿曰：孟達衆少而食支一年，吾將士四倍。



於達而糧不淹月以一月圖一年安可不速以四擊一正  
令半解猶當爲之是以不計死傷與糧兢也今賊衆我寡  
賊饑我飽水雨乃爾功力不設自發京師不憂賊攻但恐  
賊走今賊糧垂盡而圍落未合掠其牛馬抄其樵採此固  
驅之走也夫兵者詭道善因事變賊憑衆恃雨故雖飢困  
未肯束手當示無能以安之既而雨止遂合圍起土山地  
道楯櫓鉤橦發矢石雨下淵攻南圍突出懿縱擊敗之斬  
於梁水之上既入城立兩標以別新舊男子年十五已上  
七千餘人皆殺之種、毒、了、僞公卿已下皆伏誅戮其將軍畢盛等  
二千餘人遂班師帝乃遣使者勞軍于薊及齊王卽帝位



遷侍中、持節都督中外諸軍、錄尚書事、與曹爽共執朝政。更直殿中、爽以懿年位素高、父事之、每事諮訪、不敢專行。初、并州刺史陳平、畢軌、及鄧颺、李勝、何晏、丁謐、皆有才名。明帝惡其浮華、皆抑不用。曹爽輔政、驟加引擢、以爲腹心。丁謐爲爽畫策、使爽白天子、發詔轉司馬懿爲太傅、外以名號尊之、實欲令尚書奏事、先來由已、得制其輕重也。二月、以司馬懿爲太傅、以爽弟羲爲中領軍、訓爲武衛將軍。彥爲散騎常侍、侍講、其餘諸弟皆以列侯侍從、出入禁闥。晏等依勢用事、附會者升進、違忤者罷退、內外望風、莫敢忤旨。爽又用何晏、鄧颺、丁謐之謀、遷太后于永寧宮、專擅



朝政屢改制度懿不能禁於是與爽有隙懿遂稱疾不與政事時人爲之謠曰何鄧丁亂京城爽晏謂懿果疾篤會河南尹李勝將蒞荊州來候懿懿詐篤疾使兩侍婢持衣衣落指口言渴婢進粥懿不持杯飲粥皆流出沾胸勝曰衆情謂明公舊風發動何意尊體乃爾懿使聲氣纔屬說年長枕疾歿在旦夕君當屈并州并州近胡可善爲之備恐不復相見願以子師昭兄弟爲託勝退告爽曰司馬公尸居餘氣形神已離不足慮矣嘉平元年天子謁高平陵爽兄弟皆從是日太白襲月懿於是奏永寧太后廢爽兄弟太后勅如奏施行大司農桓範出赴爽蔣濟曰智囊往



矣。懿曰：爽與範內疎而智不及，駑馬戀棧豆，必不能用也。於是假司徒高柔節行大將軍事，領爽營。謂柔曰：君爲周勃矣。命太僕王觀行中領軍攝義營。懿親帥太尉、蔣濟等勒兵出迎天子，屯於洛水浮橋上。爽不肯通奏，而遣侍中許允、尚書陳泰詣懿，觀望風旨。懿數其過失，事止。免官。泰還報，爽勸之通奏。懿又遣爽所信殿中校尉尹大目諭爽，指洛水爲誓，爽意信之。桓範至，果勸爽以天子詣許昌，發四方兵以自輔。爽疑未決。範謂羲曰：「此事昭然，今日卿等門戶求貧賤復可得乎？且匹夫質一人，尚欲望活，卿與天子相隨，令於天下，誰敢不應也？」羲兄弟默然。自甲夜至五



鼓爽乃投刃于地曰司馬公正當欲奪我權耳吾以侯就  
第亦不失作富家翁範哭曰曹子丹佳人生汝兄弟狔犢  
耳何圖今日坐汝等族滅也爽乃通懿奏事懿遂奉帝還  
宮爽兄弟歸家懿發洛陽吏卒圍守之四角作高樓令人  
在樓上察視爽挾彈到後園中樓上人便唱言故大將軍  
東南行爽愁悶不知爲計有司奏黃門張當與爽有姦收  
當付廷尉考實於是收爽義訓晏颺畢軌勝并桓範皆下  
獄劾以大逆不道與張當俱夷三族懿猜忌多權變初曹  
操察懿有狼顧相欲驗之乃召使前行令反顧而正向後  
而身不動又嘗夢三馬同食一槽因謂太子丕曰司馬懿



非人臣也。必預汝家事。太子純續素與懿善。故得免。懿遂勤於吏職。至芻牧之間。悉皆臨履。由是操意遂安。及平公孫淵。大行殺戮。誅曹爽之際。支黨皆夷。及三族男女無少長。姑姊妹女子之適人者。皆殺之。既而竟遷魏鼎。云卒時年七十三。師字子元。懿長子。雅有風彩。沈毅多大略。少流美譽。與夏侯玄何晏齊名。晏嘗稱曰。惟幾也能成天下之務。司馬子元是也。懿之將誅曹爽。獨與師潛畫。弟昭弗之知也。將發夕。乃告之。既而使人覘之。師寢如常。而昭不能安席。晨會兵。司馬門鎮靜。內外置陣甚整。懿曰。此子竟可也。及懿卒。議者咸云。伊尹既卒。伊陟嗣事矣。正元元年。天子與



中書令李豐、后父光祿大夫張緝、黃門監蘇鑠等謀以太  
常夏侯玄代師輔政。師密知之，卽名殺豐、逮捕玄、緝等，皆  
夷三族。師又諷帝擅廢皇后張氏，又諷魏永寧太后下令  
廢帝，收帝璽綬，仍以齊王歸藩。迎高貴鄉公於元城而立  
之。昭字子上，師同母弟也。毋丘儉、文欽之亂，大軍東征，昭  
兼中領軍，畱鎮洛陽。及兄師疾篤，昭自京都省疾，拜衛將  
軍。師卒，天子命昭鎮許昌。尚書傳嘏帥六軍還京師，昭用  
嘏及鍾會策，自帥軍而還。至洛陽，自爲大將軍，加侍中都  
督、中外諸軍、錄尚書事。二年，鎮東大將軍諸葛誕舉兵淮  
南。三年，攻誕，斬之。夷三族。昭自爲晉公，加九錫，進位相國。



晉國置官司焉。景元元年，昭弒帝而立燕王宇之子常道鄉公璜爲帝。昭復滅蜀，進爵爲王。昭卒，炎繼昭爲晉王。泰始元年，炎篡魏國，號晉都洛陽，除魏宗族，禁錮大封族屬。咸寧七年，滅吳，詔曰：「自漢末四海分崩，刺史內親民事，外領兵馬，今天下爲一，當韜戢干戈，刺史分職，皆如漢氏故事。悉去州郡兵，大郡置武吏百人，小郡五十人，僕射山濤言：『不宜去州郡武備。』帝不聽。故永寧已後，盜賊羣起，州郡不能制，天下遂大亂。然其後刺史復兼兵民之政，州鎮愈重矣。在位二十六年，帝初卽位，厲以恭儉，有司奏御牛青絲紉斷，詔以青麻代之。大醫程據獻雉頭裘，帝命焚於殿。」

可惡



前及平吳後天下又安遂耽樂遊晏既多內寵復納孫皓  
宮人數千自此掖庭殆將萬人莫知所適惟乘羊車聽其  
所之宮人竟取竹葉挿戶以鹽汁灑地爭引帝車末年知  
太子昏庸而恃皇孫聰慧不欲廢立僕射何曾嘗云每侍  
帝語確不論經國遠圖惟說平生常事非貽厥孫謀之道也  
指諸孫曰汝輩必遇亂李生曰司馬懿於曹丕至善也曹  
叡之愛禮懿亦至懿蓋兩朝顧命大臣受遺托寄非孟德  
父子之於漢比也既受其託殺而奪之以爲已有既廢芳  
立髦矣復弑髦而立奂又廢奂而自立豈其主有劉禪之  
庸孫皓之虐者乎夫庸如劉禪而蜀之君臣如故也虐如



新書卷四  
孫皓而吳之君臣如故也。必如司馬氏父子則國家崇班重任盡爲盜柄。君之視臣如股肱心膂者乃引而納之蕭墻之內也。一介之士必有密友。況有國者將奚託哉。是不容不以篡弑論矣。

惠帝武帝第二子也。昏愚不辨菽麥。自爲太子。朝野咸知不堪及居大位。政由羣下。貨賂公行。南陽魯褒作錢神論以譏之。嘗在華林園。聞蝦蟆聲。謂左右曰。此鳴者爲官乎。私乎。或對曰。在官地爲官。在私地爲私。及天下荒亂。百姓飢餓。帝曰。何不食肉糜。其蒙蔽皆此類也。後因食麤中毒而崩。或云司馬越鳩之。在位十七年。



懷帝、武帝第二十五子也。兄弟相屠存者三。懷其一也。惠天、道、好、還、惜、懿、不見帝崩，卽帝位在位六年。劉聰攻陷洛陽，執以歸，遂見殺。秘書監荀崧曰：懷帝天姿清飭，少著英猷，若遭承平，足爲守文之主，而繼惠帝之後，東海專政，坐致流亡，可慨夫！愍帝，武帝孫也。襲封秦王。永嘉之亂，避難入於藍田、雍州。刺史賈疋遣兵迎衛，達于長安，卽位四年。劉曜逼京師，肉袒銜璧，輿視出降。劉聰出獵，令行車騎將軍戎服執戟爲導。後因大會，使行酒洗爵，反而更衣，又使執蓋，遂見殺。







藏書世紀卷五

南北兵爭

南朝晉牛氏

元帝司馬懿曾孫琅琊恭王之子也。初用王導計，出鎮建鄴。以顧榮爲軍司馬，賀循爲參佐，王敦、王導、周顗、刁協等侍左右。及懷帝被虜，愍帝嗣立，進位丞相，都督中外諸軍事。西都不守，羣臣因請卽帝位。旣而王敦內叛，四方貢獻多人敦府，將相岳牧皆出其門。元帝遂憂憤成疾，崩。在位六年。初，玄石圖有牛繼馬後之識，故司馬懿深忌牛氏。爲二榼，共一口，以貯酒。懿先飲佳者，而以毒酒鴆其將牛金。



而恭王妃夏侯氏竟通小吏牛氏而生元帝。明帝、元帝子也。聰明有斷。時兵凶歲飢。王敦外。成帝崎嶇。遵養以弱。制強。改授荆湘等四州。以分上流之勢。雖饗國日淺。而規模可覩矣。在位三年。

成帝、明帝子也。少而聰敏。及庾亮徵蘇峻。峻反。舉兵逼帝。遷石頭。庾懌嘗送酒於江州刺史王允之。與犬斃。帝聞之。怒曰。大舅已亂天下。小舅復欲爾邪。懌乃飲藥而死。畱心萬幾。務在簡約。在位七年。

康帝、成帝母弟也。中書令庾冰以舅氏當朝。言國有強敵。宜立長君。遂以爲嗣。在位三年。



穆帝、康帝子也。年三歲卽位。褚太后臨朝。會稽王昱爲撫軍大將軍輔政。在位十七年。

哀帝、成帝子也。餌方士藥有疾。崇德太后復臨朝。在位四年。

海西公、哀帝母弟也。卽位六年。桓溫誣帝在藩。夙有痿疾。嬖人朱靈寶等參侍內寢。而二美人田氏、孟氏生三男。長欲封樹。時人惑之。因諷崇德太后下令廢奕爲海西縣公。徙居吳縣。十一月妖賊許龍晨到門。稱太后密詔奉迎帝。帝曰。我得罪於此。幸蒙寬宥。且太后有詔。便應官屬來。何獨使汝也。汝必爲亂。因叱左右縛之。龍懼而走。帝知天命。



不可再深慮及禍。乃杜塞聰明。終日酣暢。耽于內寵。有子不育。時人憐之。朝廷以帝安于屈辱。不復爲虞。太元十一年薨。

簡文帝。元帝少子也。桓溫立之。帝雖神識恬暢。而無濟世大略。沙門支道林嘗言。會稽有遠體。而無遠神。在位三年。武帝字昌明。簡文帝第三子也。幼而聰悟。威權已出。雅有人主之量。而溺於酒色。好爲長夜之飲。末年。長星見。帝在華林園。舉酒祝曰。長星勸汝一杯酒。自古何嘗有萬歲天子。時張貴人有寵。帝戲之曰。汝以年當廢矣。貴人恚。因帝醉。夜使婢覆以被。蒙帝面弑之。云。因魘暴死。在位二十四



年時會稽王道子昏惑其子元顯專權竟不究其事  
安帝武帝長子也自少及長口不能言至不能辨寒暑凡  
動止皆非已出故桓玄之篡因此獲全初識云昌明之後  
有二帝劉裕將謀禪密使王紹之縊帝而立恭帝在位二  
十三年

恭帝安帝母弟也劉裕至京師傅亮承裕密旨諷帝禪位  
帝欣然曰晉氏久已失之今復何恨乃書詔遂遜於琅琊  
第宋末初二年裕使兵人踰垣而入弑之在位二年

種毒







定亂代興

宋劉裕

劉裕小字寄奴，裕素貧，時人莫知。唯琅琊王謐知之。裕常負刀，逵社錢三萬，被逵執，不得脫。謐代之償，故裕德謐。後裕伐荻新洲，有大蛇數丈，裕射之。明日至，聞有杵臼聲，見童子數人，皆青衣，擣藥。裕問其故，荅曰：「我王爲劉寄奴所射，合藥傳之耳。」裕曰：「王何不遂殺之？」曰：「劉寄奴王者不歿，裕叱之，皆散走。」裕遂收藥而反，以傳金創，無不立驗。孫恩作亂於會稽，朝廷遣將軍劉牢之往討，以裕參府軍事。牢之遣裕與數十人覘賊，卒遇賊衆數千，裕與戰，所將人多



歿而裕獨奮長刀殺傷賊衆已而衆騎並至遂平山陰恩  
遁入海元興元年桓玄篡位遷晉主於潯陽桓修入朝裕  
從至建鄴玄見裕私謂王謐曰劉裕風骨不常蓋人傑也  
玄妻劉氏尚書令耽之女亦謂玄曰劉裕龍行虎步視瞻  
不凡恐必不爲人下修尋還京口裕以此託疾不與修偕  
行而與何無忌及弟道規沛國劉毅等密謀起兵矣玄聞  
義兵起懼而謂所親曰劉裕足爲一世之雄劉毅家無擔  
石之儲樗蒲一擲百萬何無忌劉牢之外甥酷似其舅共  
舉大事何謂無成也時衆咸推裕爲盟主庚申裕鎮石頭  
立畱臺總百官焚桓溫主於宣陽門外造晉新主於太廟



命尚書王嘏率百官奉迎乘輿。初，晉陵人韋叟善相術。桓  
修令相裕當得州不，叟曰：「當得邊州。」退而告裕曰：「君相貴，  
不可言。」裕笑曰：「相若准，當用君爲司馬。」至是，叟詣裕，裕遂  
用焉。玄挾晉主走江陵，劉毅何無忌、劉道規等追及玄，大  
破玄軍於崢嶸洲。玄復挾晉主入蜀，至枚回州，益州督護  
馮遷斬玄，而桓玄滅。晉主至自江陵，召進裕侍中、車騎將  
軍、都督中外諸軍、錄尚書事。五年，南燕主慕容超大掠淮  
北，裕抗表伐之，發建康帥舟師自淮入泗，至下邳，畱船艦。  
輜重步進至琅琊，或謂裕曰：「燕人若塞大峴之險，或堅壁  
清野，大軍深入，將奈何？」裕曰：「吾慮之熟矣。鮮卑貪婪，不知



遠計進利虜獲退惜禾苗謂我孤軍遠入不能持久不過  
進據臨朐退守廣固必不能守險清野矣超聞晉師至引  
羣臣會議公孫五樓曰吳兵輕果利在速戰不可爭鋒宜  
據大峴使不得入曠日延時沮其銳氣然後徐簡精騎循  
海而南絕其糧道別敕段暉帥兗州之衆緣山東下腹背  
擊之此上策也各命守宰依險自固芟除禾苗使敵無所  
資彼僞軍無食求戰不得旬月之間可以坐制此中策也  
若縱賊入峴出城逆戰非勝筭矣超不聽裕過大峴燕兵  
不出裕舉手指天喜形於色左右曰公未見敵而喜何也  
裕曰兵已過險士有必死之志餘糧棲畝人無匱乏之憂



虜已入吾掌中矣。六月，裕與燕兵戰於臨朐南，參軍胡藩言於裕曰：「燕悉兵出戰，臨朐城中畱守必寡，願以奇兵從間道取其城。」裕從之。丙子，克其大城。於是因齊地糧儲，悉停江淮漕運，超求救於秦。秦王興使謂裕曰：「慕容氏相與隣好，今晉攻之急，秦已遣鐵騎十萬屯于洛陽。若晉軍不退，卽當長驅而進。」裕謂秦使曰：「語汝姚興，我克燕之後，息兵三年，當取關洛也。今可速來。」劉穆之聞有秦使，馳入見裕。裕以所言告穆之。穆之曰：「此語不足以威敵，適足以怒敵耳。若廣固未下，羌寇奄至，不審何以待之。」裕笑曰：「此是兵機，非卿所解。夫兵貴神速，彼若審能赴救，必畏我知。」寧



容先遣逆設此言耶。是自張大之辭也。晉師不出。爲日久矣。羗見伐齊。殆將內懼。自保不暇。何能救人乎。丁亥。劉裕悉衆攻城。或曰。今日徃亡。不利。裕曰。我徃彼亡。何爲不利。遂進攻。獲超。送詣建康。斬之。而南燕滅。盧循反廣州。循孫恩妹壻也。時裕將鎮下邳。進攻河洛。聞循反。乃班師。次于山陽。卷甲徑造江上。知賊尚未至。乃大喜。四月。裕至都。于時北師始還。傷痍未復。戰士纔數千。鎮南將軍何無忌。又與循衆徐道覆戰歿。孟昶懼。欲擁主過江。裕曰。今重鎮外傾。強敵內迫。人情危駭。莫有固志。若一旦遷動。便自土崩瓦解。江北亦安得至。設使得志。不過延日月耳。今兵士雖



少猶足一戰。若其克濟，臣主同休。如其不然，不復能草間求活。吾計決矣。議者又欲分兵屯守諸津。裕曰：賊衆我寡，分其兵則測人虛實，一處失利，則沮三軍之氣。若聚衆石頭，則衆力不分，或可冀也。戊午，裕移鎮石頭。賊大至。裕曰：賊若新亭直上，且將避之。若回泊蔡洲，成擒耳。徐道覆欲自新亭焚舟而戰，循多疑，少決。果泊蔡洲。裕登石頭，使建威將軍孫處自海道襲番禺。戒之曰：我于二月必破妖寇，卿亦足至番禺，先傾其巢窟也。二月，盧循兵敗，回至番禺。果爲孫處所破，循收餘衆南走交州。刺史杜惠度斬盧循父子，函七首送都下。盧循滅，而廣州平。八年，荊州刺史劉



道規患疾以豫州刺史劉毅代之毅既有雄才大志與裕俱興復晉室自謂京城廣陵功足相抗雖權事推裕而心不服裕知毅終爲異端遣叅軍王鎮惡襲江陵克之毅及黨與皆伏誅而劉毅滅先是譙縱據蜀裕遣劉敬宣往伐譙縱求救于秦秦兵至敬宣引還至是裕復謀伐蜀裕以西陽太守朱齡石有武幹欲用爲元帥衆謂齡石資名尚輕難當重任裕不聽卽以齡石爲益州刺史裕與齡石密謀進取曰劉敬宣往年出黃虎無功而退賊謂我今應從外水往而料我當出其不意猶從內水來也如此必以重兵守涪城備內道若向黃虎正墮其計今大衆宜自外水



取成都而以疑兵出内水。因函書封齡石署函邊曰：至白帝，乃開視。朱齡石等至白帝，發函見書，衆軍悉從外水取成都。臧熹從中水取廣漢，老弱乘高艦千餘，從内水向黃虎。於是諸軍倍道兼行，尅日圍城。戊辰，縱棄城走。壬申，齡石入成都，縱自縊歿。譙縱滅而成都平。初，裕平齊，卽有定關洛意。遇盧循反，故止。至是，聞姚興歿，子泓新立，兄弟相殺，關中擾亂。十二年，裕表伐關洛，乃以世子爲中軍將軍，監太尉留府事。劉穆之領監軍中軍二府，軍司入居東府，總攝内外。十三年，衆軍至洛，圍金墉，降之。裕修復晉五陵，置守衛。三月，裕率大軍入河。五月，帝至洛陽，謁晉五陵，八



月扶風太守沈田子大破姚泓軍於藍田王鎮惡尅長安禽姚泓而關洛平十月裕進爵爲王裕欲息駕長安經略趙魏聞前將軍劉穆之卒乃歸歸遂代晉國號宋三年宋主殂年六十葬蔣山謚武皇帝裕微時耕於丹徒至受命耨耜之具咸命收藏及文帝幸舊宮見之而問好貨不覺有慚色孝武大明中壞宋主所居陰室起玉燭殿牀頭有土障壁上掛葛燈籠麻繩拂侍中袁顗因盛稱主儉素之德孝武不荅獨曰田舍公得此以爲過矣少帝義符武帝長子卽位一年居處所爲多乖失徐羨之傅亮廢爲營陽王復弑之



文帝義隆武帝第三子徐羨之傅亮迎立之元嘉三年殺  
徐羨之傅亮帝雅重文儒躬勤政事百官乂于其職守宰  
以六期爲斷惜其不自量力橫挑強胡使師徒殲于河南  
戎馬飲于江津及其廢立之際狐疑不決遂爲子劭所弑  
在位三十年

武帝駿文帝第三子舉兵誅劭自立在位十一年機警勇  
決文章華贍王僧虔以善書見忌僧虔至以秃筆書自免  
奢慾敗度待諸弟如讎

廢帝子業武帝子旣卽位凶悖日甚誅殺相繼壽寂之等  
弑之而立湘東王彧在位一年



明帝或文帝子暴虐諸王宋子孫盡矣在位八年

蒼梧王昱明帝子嬖人李道兒所生也初或以陳太妃賜  
嬖人李道兒已復迎還生昱故昱每微行自稱李將軍常  
著小袴衫管署巷陌無不貫串或夜宿客舍或晝臥道傍  
排突廝養與之交易或遭慢辱悅而受之凡諸鄙事裁衣  
作帽過目則能未嘗吹篪執管便韻一日不殺則慘然不  
樂端午太后賜扇昱嫌其不華令太醫煮酖左右止之曰  
若行此事官便應作孝子豈復得出入狡獪昱曰汝語大  
有理後以太后令追廢爲蒼梧王在位五年

○可○憐○

順帝明帝第三子蕭道成勒兵入宮泣而彈指曰願世世



不生帝。王<sub>毒の發</sub>家遂被弒。在位三年。年十一。



不主帝王家後外餘外三平十一



誅暴代立

齊蕭氏

蕭道成東海蘭陵人也。宋明帝卽位，以道成非人臣相，而人間流言，咸云道成當爲天子。故明帝疑之。及明帝崩，蒼梧王卽位，以道成爲右衛將軍，領衛尉。元徽二年，江州桂陽王休範舉兵尋陽。道成曰：昔上流謀逆，皆因淹緩致敗。休範必遠，懲前失，輕兵急下，乘我無備，請頓新亭以當其鋒。乃單車白服出新亭。宋主加道成節，都督征討諸軍事。平南將軍築新亭壘未畢，賊前軍已至。道成乃解衣高臥，以安衆心。索白虎幡登西垣，使員外郎王敬則浮舸與賊



戰大破之。未時，張敬兒斬休範首，臺軍及賊衆尚不知。休範已斬也。賊帥王文豪設伏破臺軍於皂莢橋，直至朱雀航。王道隆、劉劭並戰沒。賊進至杜姥宅。府軍長史褚澄又開東府，納賊張永兵，潰於白下。宮內傳言，顯達、張敬兒執蒼梧王，手泣曰：「事敗矣！」道成急遣軍主陳顯達、張敬兒等從石頭濟淮，聞道成自承明門入衛宮闕。時休範與籤許公與詐稱休範在新亭，士庶惶惑，詣壘投名者以千數。及至，乃知是道成。道成隨得輒燒焚之，登城謂曰：「劉休範父子昨已戮，歿在南岡下，身是蕭平南、汝等名字皆已焚燒，勿懼也。」遂分遣衆軍擊平賊。道成振旅凱入，百姓緣道。



聚觀小全國家者此公也。休範平後，蒼梧漸行兇暴，屢欲害道成，嘗率數十人直入鎮軍府，時暑熱，道成晝臥裸袒，蒼梧立道成于室內，指腹爲射的，自引滿將射之。道成神色不變，歛衫曰：「老臣無罪，蒼梧左右王天恩。」曰：「領軍腹大，是佳射棚，而一箭便死，無復的矣。」不如以電箭射之。乃取電箭一發，卽中道成臍。蒼梧投弓於地，大笑曰：「此棚何如？」道成威名旣重，蒼梧深忌之。道成憂懼，乃密與袁粲、褚淵謀廢立。秋七月七夕，楊玉夫等弑之，而立順帝。道成自爲太尉、都督十六州諸軍事，謀代宋。建元元年，道成卽帝位，國號齊，封順帝爲汝陰王，仍弑之。又、種、毒。宋宗室無少長皆死，齊



主博學善屬文、工草隸書、奕棋第二品、每日使我臨天下  
十年、當使黃金與士同價、所著文、詔中書侍郎江淹撰次  
之、又詔東觀學士撰史林三十篇、魏文帝皇覽之流也、在  
位三年

武帝、高帝長子也、在位十一年、

廢帝、鬱林王、武帝孫也、少美容止、好隸書、武帝特所鍾愛、  
勅皇孫手書不得妄出、以貴之、及卽位、西昌侯鸞有異志、  
謀弑之、乃稱廢帝、矯情飾詐、陰懷鄙慝、嘗侍文惠太子疾、  
及居喪、哀容號毀、旁人見者莫不嗚咽、裁還私室、卽歡笑  
酣飲、淫虐不道等事、遂遇弑

○壽○發○



海陵王鬱林弟也。蕭鸞立之○毒○發○。復弑之而自立。

明帝鸞高帝之姪。即位五年。大行誅戮。殺高武子孫無遺。○毒○發○。前古未有也。

後廢帝東昏侯明帝子。在位二年。委任羣小。誅諸宰臣。又鑿金爲蓮花帖地。令潘妃行其上。曰。此步步生蓮花也。大虐無道。大臣恐懼。乃謀應蕭衍。遂被弑。○毒○發○

和帝寶融明帝子。東昏之亂。長史蕭穎胄奉寶融舉兵。以雍州刺史蕭衍都督前鋒諸軍事。及蕭穎胄卒。蕭衍遂代齊。廢寶融爲巴陵王。仍遣鄭伯禽以生金進王。王曰。我死。不須金。飲醇酒足矣。乃引飲。一升伯禽就加摺焉。在位二

又○種○毒○







誅暴代立

梁蕭氏

蕭衍，蘭陵人，生而有異光，狀貌殊特，日角龍顏，重岳虎顧，舌文八字，身映日無影，有文在右手，曰武。爲兒時，能蹈空而行，及長，博學多通，有文武才幹。初爲衛軍王儉東閣祭酒，儉一見，謂人曰：「蕭郎三十內當作侍中，出此則貴不可言。」竟陵王子良開西邸，招文學，衍與沈約、謝朓、王融、蕭琛、范雲、任昉、陸倕等並游，號曰八友。齊明帝將廢鬱林，每與衍密謀，及齊明卽位，性猜忌，衍避時嫌，解遣部曲，但乘折角小牛車。先是，雍州相傳：「樊城有王氣，至是齊明崩，遺詔。」



以衍爲都督雍州刺史、衍至襄陽、乃潛造器械、多伐竹木、沉於檀溪、密爲舟船之備。二年冬、衍長兄懿被害、信至、衍乃起兵、殺東昏、進爵爲王。天監元年、衍自立爲帝、國號梁。八年、魏取梁三關。十六年、用釋氏法、長齋一食、惟菜羹糲飯。又詔以宗廟用牲牢、有累冥道、宐皆以麴爲之。普通五年、魏有六鎮之亂、梁復取三關。是年、以散騎常侍朱异掌機政。八年、改元大通。梁主舍身同泰寺。三年、改元中大通。元年、再舍身同泰寺、設大會、釋御服、持法衣、行清淨大捨、素牀瓦器、乘小車、役私人、親爲四衆講涅槃經。羣臣以錢一億萬奉贖、表請還宮。三請乃許。三年、太子統卒、太子好



讀書屬文、謚曰昭明、初昭明太子、葬丁貴妃、有道士云、此地不利長子、請厭之、乃爲臘鵞及諸物、埋于墓側、後梁主

殺生多矣、有累冥道

聞之、遣檢掘得鵞物、大驚、悉誅道士等、以故太子終身慚憤、不能自明、大同三年、修長干寺阿育王塔、時王侯子弟、多驕淫不法、上年老厭于萬幾、又專精佛戒、每斷重罪、則終日不懌、或謀反逆事覺、亦泣而宥之、由是王侯益橫、中大同元年、梁主幸同泰寺、講三慧經、太清元年、高歡卒、侯景來降、二年、侯景叛、襲破臺城、梁主遂爲所弑、年八十三、武帝少而篤學、雖萬機多務、猶卷不輟手、燃燭常至戊夜、撰通史六百卷、金海三十卷、孝經義、周易講疏、毛詩春秋



荅問尚書大義、中庸講疏、孔子正言、凡二百餘卷、贊序、詔  
誥、銘、誄、箴、頌、箋、奏、諸文、又百二十卷、六藝備聞、基、登、逸品、  
陰陽緯候、卜筮占決、草隸尺牘、騎射、莫不稱妙、晚乃溺信  
佛道、製涅槃大品、淨名三慧、諸經義記、數百卷、聽覽餘聞、  
卽於重雲殿、及同泰寺講說、名僧碩學、四部聽衆、常萬餘  
人、在位四十八年

簡文帝綱、武帝第三子也、卽位二年、爲侯景所制、旋見廢、  
帝幼而聰慧、六歲便能屬文、武帝弗信、求面試、攬筆立成、  
武帝嘆曰、我常以東阿爲虛、今果然矣、及長、器宇寬弘、眇  
眇則目光燭人、讀書十行俱下、辭藻艷發、然傷于輕靡、時



號宮體所著昭明太子傳并諸經傳共六百六十餘卷並  
行于世既見廢自知不义指所居殿謂舍人殷不害曰麗  
涓、灰、于、此、後、王、偉、與、彭、雋、王、修、纂、進、觴、而、前、曰、丞、相、以、陛、  
下、幽、憂、日、久、使、臣、上、壽、簡、文、笑、曰、已、禪、位、何、得、言、陛、下、遂、  
盡、酣、謂、曰、不、圖、爲、樂、一、至、于、此、既、醉、而、寢、雋、進、土、囊、遂、灰、  
時太子大器及王侯在建康者二十餘人皆灰太子神明  
端疑所親竊問之太子曰賊若未見殺吾雖陵慢呵叱終  
不敢害若見殺時至雖一日百拜亦無益也又曰殿下居  
困阨而神貌怡然何也太子曰若諸叔能滅賊賊必先見  
殺然後就灰若其不然賊亦殺我以取富貴安能以必灰



之命、爲無益之愁乎、及難、顏色不變、徐曰、久知此事、嗟其晚矣、

元帝、繹武帝第七子、封湘東王、太清二年、侯景叛、舉兵圍臺城、簡文帝大寶元年四月、繹移檄討侯景、八月、侯景廢簡文帝、立豫章王棟、棟太子統之孫也、已而景廢棟、自稱帝、八月、王僧辯、陳霸先擊敗侯景、景亡、走吳、十一月、王僧辯等奉表勸進、繹立爲帝、繹攻書、善畫、自圖宣尼像、爲之贊、而書之時、人謂之三絕、著孝德傳、忠臣傳、等書、共五百餘卷、在位三年、

敬帝、蕭詧、昭明太子統之第三子也、大同元年、除西中郎



將雍州刺史、訖以襄陽形勝之地、又梁武創基之所、時平足以樹根本、時亂足以圖霸功、及侯景作亂、蕭繹攻訖兄譽于湘州、訖率衆攻江陵以救之、會大雨暴至、訖遁歸襄陽、器械資重多沒于水、訖恐不能自固、乃遣蔡大寶求附庸于西魏、已而訖與魏師襲江陵、蕭繹被殺、魏柝宇文泰命訖主梁嗣、居江陵東城、資以江陵一州之地、其襄陽所統盡入于魏、訖稱帝于其國、訖見邑居殘毀、干戈日用、常懷憂憤、乃著愍時賦以見志、居常怏怏、抱歎吒者久之、遂以憂憤發背而歿、訖篤好文義、所著文集十五卷、內典華嚴般若法華、金光明義疏三十卷、並行于世、在位三年







走亂代立

陳陳氏

陳霸先少倣儻有大志及長涉獵史籍好讀兵書明緯候孤虛遁甲之術武勇明達爲當時推服常夢天開數丈有四、人、朱、衣、捧、日、納、之、口、中、及覺腹內猶熱以軍功除高要太守二年冬侯景寇逼霸先將赴援時湘東王繹承制遣征東將軍王僧辯督衆軍討侯景授霸先東揚州刺史三年霸先帥師發自豫章進討侯景景敗走承聖三年進霸先、空、及魏平江陵霸先與王僧辯等請晉安王方智以太宰承制晉安王至自尋陽方入居朝堂而齊適送貞



陽侯明還、王僧辯納之、霸先固爭不從、九月、霸先討王僧辯、甲辰、霸先至石頭、遣勇士自城北踰入、因風縱火、僧辯就禽、於是廢貞陽侯而奉晉安王卽位、太平八年、霸先代梁卽帝位、國號陳、在位二年、子昌瑱皆以江陵之陷沒于長安、內無嫡嗣、外有強敵、乃召臨川王儁嗣位、

文帝、武帝姪也、起自布衣、知百姓疾苦、國家資用、務從儉約、一夜內刺閨取外事分判者、前後相續、每鷄人伺漏、傳籤殿中、若令投籤于階石上、鎗然有聲、云吾雖得眠、亦令驚覺、其強苦如此、在位七年、

廢帝、文帝長子、性仁弱、國柄歸于安成王瑒、瑒廢帝爲熙



海王而自立、在位三年

宣帝武帝次姪也、是時淮南之地並入于齊、帝志復舊境、思反侵地、疆弱之形既異、及周兵滅齊、乘勝而舉、略地遂至江際、在位十四年

后主宣帝子也、在位六年、初隋文帝篡周、甚敦鄰好、太建末、隋兵大舉、聞宣帝崩、乃班師、仍遣使赴弔、修敵國禮、書稱名姓、頓首、而後主益驕、荒於酒色、左右嬖佞、珥貂者五十人、婦人美貌麗服、巧態以從者千餘人、常使張貴人等八人夾坐、江總、孔範等十人豫宴、號曰狎客、先令八婦人、襍采箋製五言詩、十客一時繼和、遲則罰酒、君臣酣飲、從



夕達旦，以此爲常。隋文帝謂高頴曰：「我爲百姓父母，豈可限一衣帶水，不拯之乎？」命大作戰船，曰：「吾將顯行天誅。」卽以晉王廣爲元帥，督八十總管來討。辛巳，賀若弼進軍鍾山，乘勝進軍宮城，燒北掖門。韓禽虎率衆趣宮城，自南掖門入城內。文武百司皆遁。唯僕射袁憲侍側。憲勸後主端坐殿上，正色以待之。後主曰：「鋒刃之下，未可交當。吾自有計。」乃逃于井。旣而軍人窺井，呼之不應，欲下石。乃聞叫聲，以繩引之，驚其太重。及出，乃與張貴妃、孔貴人三人同乘而上。旣見隋文帝，給賜甚厚，令班同三品。每預宴，爲不奏吳樂，恐傷其心。監者言：「叔寶與子弟等，日飲一石，終日沉。」

此時飲



可著

醉罕有醒時、隋文時使節其酒、既而曰、任其性、不爾、何以

聖人心事

絕妙

過日、及從東巡、登芒山、侍飲賦詩曰、日月光天德、山河壯

帝居、太平無以報、願上東封書、後從至仁壽宮、及出、隋文

帝目之曰、此敗豈不由酒、當賀若弼度京口、彼中人密啟

告急、叔寶正飲酒、不知省、高頴至、猶見啟在牀下、尚未

是賞是罰

開封、此亦大可笑、李生曰、樗櫟以不材得終其天年、此之

謂矣

卓吾子曰、劉裕以讖故弒昌明、立恭帝、又遣傅亮諷帝禪

位、帝欣然書詔曰、晉氏久已失之、重為劉公所延、今日之

事、本所甘心、遂遜于琅琊策夫、裕之功德巍巍、四海服心、



久矣。晉氏衰弱已極，卽以琅琊一區處之，如漢獻故事，亦自無患。何必更使兵人踰垣而入弑之也？雖司馬懿之毒，必發，虐必報，然裕者亦可以省此毒手矣。連弑二無罪之君，以自種毒，故裕子義符卽位未幾，復爲傅亮所弑。子孫繼立，自相屠夷，無子遺者，而蕭道成遂勒兵而入，毒亦遂發矣。蕭道成之來山，卽謂功在社稷，志切救主，反爲蒼梧所害，出不得已，於焉廢蒼梧而立順帝，復弑蒼梧而自帝位，封順帝爲汝陰王，足矣。人心歸齊，而怨宋亦自無足虞者，乃復弑順帝，令宋室子孫無少長皆歿，何也是？又無文曰：種此毒也。故蕭衍代齊，遂廢寶融爲巴陵王，仍遣鄭



禽以生金進而加招之此亦蕭道成自種之毒不得不  
發於其子孫與蕭衍之手者又可逃乎設使道成子孫不  
自相屠至蕭衍亦決不肯畱種矣最好笑者蕭衍斷死刑  
則泣以麴爲犧牲以昭明太子故盡殺道士略無餘人  
卒致太子歿而身不侯景所弑其子簡文求歿不得竟仆  
絕於土囊之口矣又并其太子大器及王侯在建康者盡  
數皆歿其毒不更慘耶夫我以生金進彼彼亦以土囊進  
我一施一報自是常理也獨陳霸先不忍殺一口以代梁  
故其後主雖荒淫不度遭遇隋堅刻毒異甚反哀而禮之  
爲不奏吳樂以安其心夫堅豈不嗜殺人者陳霸先之不



殺先之也。余是以知毒之發百倍於種。福之加萬倍於施。天道不爽如此。可畏又如此。奈之何甘自種毒而不悔也。

















